

四庫全書

史部

欽定四庫全書

史部  
通志卷五下

詳校官侍讀<sub>臣</sub>陳萬青

編修<sub>臣</sub>裴謙覆勘

覆校官助教<sub>臣</sub>金學詩

校對官中書<sub>臣</sub>張 塤

謄錄監生<sub>臣</sub>祝 然

欽定四庫全書

通志卷五下

宋 右 廸 功 郎 鄭 樵 漁 仲 撰

前漢紀第五下

文帝 景帝 武帝 昭帝 宣帝 元帝 成

帝 哀帝 平帝

孝文皇帝名恒之字常高祖第四子也母曰薄姬高祖  
十一年春已破陳豨定代地立為代王都中都即王位

十七年高后崩諸呂謀為亂欲危劉氏丞相陳平太尉周勃朱虛侯劉章等共誅之謀立代王遂使人迎代王郎中令張武等議皆曰漢大臣皆故高帝時將習兵事多謀詐其屬意非止此也特畏高帝呂太后威耳今已誅諸呂新喋大類反履涉也血京師以迎大王為名實不可信

願稱疾無往以觀其變中尉宋昌進曰秦失其政豪傑並起人人自以為得之者以萬數然卒踐天子位者劉氏也天下絕望一矣高帝封王子弟地犬牙相制所謂



磐石之宗也天下服其彊二矣漢興除秦苛政約法令  
施德惠人人自安難動搖三矣夫以呂太后之嚴立諸  
呂為三王擅權專制然而太尉以一節入北軍一呼士  
皆袒左為劉氏畔諸呂卒以滅之此乃天授非人力也  
今大臣雖欲為變百姓弗為使其黨寧能專一邪況內  
有朱虛東牟之親外畏吳楚淮南琅邪齊代之彊方今  
高帝子獨淮南王與大王大王又長賢聖仁孝聞於天  
下故大臣因天下之心而欲迎立大王幸勿疑也代王

報太后計猶豫未定卜之兆得大橫占曰大橫庚庚余  
為天王夏啓以光代王曰寡人固已為王矣又何王乎  
卜人曰所謂天王者乃天子也於是代王乃遣太后弟  
薄昭往見太尉勃等具言所以迎立王者昭還報曰  
信矣無可疑者代王笑謂宋昌曰果如公言乃令昌驂  
乘張武等六人乘六乘傳詣長安至高陵休止而使宋  
昌先馳之長安觀變昌至渭橋丞相以下皆迎昌還報  
代王乃進至渭橋羣臣拜謁稱臣代王下車拜太尉勃

進曰願請閒言宋昌曰所言公公言之所言私王者不受私太尉乃跪上天子璽符代王謝曰至代邸而議之閏月己酉入代邸羣臣從至上議曰丞相臣平太尉臣勃大將軍臣武御史大夫臣蒼宗正臣郢朱虛侯臣章東牟侯臣興居典客臣揭再拜言大王足下子弘等皆非孝惠皇帝子不當奉宗廟臣謹請陰安侯高帝兄伯妻頃王后兄仲妻也與琅邪王宗室大臣列侯吏二千石議曰大王高皇帝長子宜為高帝嗣願大王即天子位代王曰

奉高帝宗廟重事也寡人不佞不足以稱願請楚王計  
宜者寡人不敢當羣臣皆伏固請代王西鄉讓者三南  
鄉讓者再丞相平等皆曰臣伏計之大王奉高帝宗廟  
最宜稱雖天下諸侯萬民皆以為宜臣等為宗廟社稷  
計不敢忽願大王幸聽臣等臣謹奉天子璽符再拜上  
代王遂即天子位羣臣以禮次侍乃使太僕嬰與東牟  
侯興居先清宮奉天子法駕迎於代邸皇帝即日夕入  
未央宮夜拜宋昌為衛將軍鎮撫南北軍張武為郎中

令行殿中還坐前殿於是夜下詔曰制詔丞相太尉御史大夫閒者諸呂用事擅權謀為大逆欲危宗廟賴將相列侯宗室大臣誅之朕初即位其赦天下賜民爵一

級女子百戶牛酒酺五日

賜爵者謂一家之長得之也女子謂賜爵者之妻率百戶

共得牛若干頭酒若干石無定數也漢律三人以上無故羣飲酒罰金四兩今詔橫賜得令會聚飲食五日也

元年冬十月辛亥皇帝見于高廟右丞相徙為左丞相太尉勃為右丞相大將軍灌嬰為太尉壬子遣車騎將軍薄昭迎皇太后于代詔曰前呂產自置為相國呂祿

為上將軍擅矯遣灌將軍嬰將兵擊齊欲代劉氏嬰留  
滎陽與諸侯合謀以誅呂氏呂產欲為不善丞相平與  
太尉勃等謀奪呂產等軍朱虛侯章首先捕斬產太尉  
勃身率襄平侯通持節承詔入北軍典客揭奪呂祿印  
其益封太尉勃邑萬戶賜金五千斤丞相平將軍嬰邑  
各三千戶金二千斤朱虛侯章襄平侯通邑各二千戶  
金千斤封典客揭為陽信侯金千斤十二月立趙幽王  
子遂為趙王徙琅邪王澤為燕王呂氏所奪齊楚地皆

歸之詔曰法者治之正也所以禁暴而率善人也今犯  
法已論而使無罪之父母妻子同產坐之及為收孥朕  
甚不取其除收孥諸相坐律令正月有司請早建太子  
詔曰朕既不德今縱不能博求賢聖有德之人而禪天  
下焉而曰豫建太子是重吾不德也謂天下何其安之  
有司曰豫建太子所以重宗廟社稷不忘天下也上曰  
楚王季父也明於國家之大體吳王於朕兄也惠仁以  
好德淮南王弟也秉德以陪朕諸侯王宗室昆弟有功

臣多賢及有德義者今不選舉焉而曰必子人其以朕  
為忘賢有德者而專於子非所以憂天下也朕甚不取  
有司固請曰古者殷周有國治安皆千歲有天下者莫  
長焉用此道也立嗣必子所從來遠矣高帝始平天下  
建諸侯為帝者太祖諸侯王及列侯始受國者亦皆為  
其國祖子孫繼嗣世世弗絕天下之大義也故高帝設  
之以撫海內今釋宜建而更選於諸侯宗室非高帝之  
志也子啓最長敦厚慈仁請建以為太子上乃許之因



賜天下民當代父後者爵各一級封將軍薄昭為軹侯  
三月立太子母竇氏為皇后上為立后故詔鰥寡孤獨  
窮困之民議振貸之又曰今歲首不時使人存問長老  
又無布帛酒肉之賜將何以佐天下子孫孝養其親其  
令縣道

有蠻夷  
曰道

年八十已上賜米人月一石肉二十斤

酒五斗其九十已上又賜帛人二匹絮三斤刑者及有  
罪耐以上不用此令楚元王交薨四月齊楚地震二十  
九山同日崩大水潰出六月令郡國無來獻施惠天下

諸侯四夷遠近驩洽乃修代來功詔曰方大臣誅諸呂  
迎朕朕狐疑皆止朕惟中尉宋昌勸朕朕得保宗廟已  
尊昌為衛將軍其封昌為壯武侯諸從朕者六人官皆  
至九卿又曰列侯從高帝入蜀漢者六十八人益邑各  
三百戶故吏二千石以上從高帝潁川守尊等十人食  
邑六百戶淮陽守申屠嘉等十人五百戶衛尉足等十  
人四百戶封淮南王舅父趙兼為周陽侯齊王舅父駟  
鈞為靖郭侯故常山丞相蔡兼為樊侯

二月冬十月丞相陳平薨詔曰古者諸侯建國千餘各守其地以時入貢民不勞苦今列侯多居長安邑遠吏卒給輸費苦而列侯亦無繇教訓其民其令列侯之國為吏及詔所止者遣太子十一月癸卯晦日有食之詔曰天下治亂在予一人二三執政猶吾股肱也朕之不德上累三光之明其悉思朕之過失及知見之所不及旬以啓告朕及舉賢良方正能直言極諫者以匡朕之不逮因各勅以職任務省繇費以便民朕既不能遠德

故憫然念外人之有非是以設備未息今縱不能罷邊屯戍而又飭兵厚衛其罷衛將軍軍太僕見馬遺財足餘皆以給傳置春正月丁亥詔開籍田朕將親率耕以給宗廟粢盛民謫作縣官及貸種食未入未備者皆赦之三月詔立趙王遂弟辟疆為河間王朱虛侯章為城陽王東牟侯興居為濟北王因立皇子武為代王參為太原王揖為梁王五月詔除誹謗妖言之律又民或祝詛者此細民之愚無知抵死自今以來有犯此者勿

聽治九月初與郡國守相為銅虎符竹使符詔勸民務農其賜天下今年田租之半

三年冬十月丁酉晦日有蝕之十一月丁卯晦日有蝕之詔曰前遣列侯之國辭未行丞相朕之所重其為朕率列侯之國遂免丞相勃遣就國十二月太尉潁陰侯灌嬰為丞相罷太尉官屬丞相夏四月城陽王章薨淮南王長殺辟陽侯審食其五月匈奴入北地居河南為寇帝初幸甘泉六月帝曰漢與匈奴約為兄弟毋使害

邊境所以輸遺匈奴甚厚今右賢王離其國將衆居河南降地陵轢邊吏入盜甚教無道非約也其發邊吏騎八萬五千詣高奴遣丞相灌嬰擊之匈奴去發中尉材官屬衛將軍軍長安辛卯帝自甘泉之高奴因幸太原見故羣臣皆賜之舉功行賞諸民里賜牛酒復晉陽中都民三歲租留游太原十餘日濟北王興居聞帝之代欲自擊匈奴乃反發兵欲襲滎陽於是詔罷丞相兵以棘蒲侯柴武為大將軍將四將軍十萬衆擊之祁侯繪

賀為將軍軍滎陽秋七月上自太原至長安詔曰濟北王背德反上誑誤吏民為大逆濟北吏民兵未至先自定及以軍城邑降者皆赦之復官爵與王興居去來者亦赦之八月虜濟北王興居自殺赦諸與興居反者四年冬十二月丞相灌嬰薨夏五月復諸劉有屬籍家無所與賜諸侯王子邑各二千戶秋九月封齊悼惠王子七人為列侯絳侯周勃有罪逮詣廷尉詔獄作顧成廟

如淳曰身存而立廟也自是皆有其廟景曰德陽武曰龍淵昭曰徘徊宣曰樂游元曰長壽成曰陽池

五年春二月地震夏四月除盜鑄錢令更造四銖錢

六年冬十月桃李華十一月有司言淮南王長出入擬於天子廢先帝法與棘蒲侯太子竒謀反遣使閩越及匈奴發其兵欲危宗廟社稷羣臣議曰當棄市帝不忍致法於王赦其罪廢勿王羣臣請處王蜀嚴道邛都帝許之道病死上憐之後十六年追尊淮南王諡厲王王其子三人為淮南王衡山王廬江王

七年冬十月令列侯太夫人夫人諸侯王子及吏二千



石無得擅徵捕夏四月赦天下六月癸酉未央宮東闕  
累恩災

八年夏封淮南厲王長四子為列侯有長星出於東方  
九年春大旱

十年冬行幸甘泉將軍薄昭死

十一年冬十一月行幸代春正月上自代還夏六月梁  
王揖薨匈奴寇狄道

十二年冬十二月河決東郡春正月賜諸侯王女邑各

二千戶二月出孝惠皇帝後宮美人令得嫁三月除關  
無用傳詔曰朕親率天下農十年于今詔書數下而歲  
功未興是吏奉吾詔不勤而勸民不明也其賜農民今  
年租稅之半又遣謁者勞賜三老孝者帛人五匹悌者  
力田二匹廉吏二百石以上率百石者三匹又問民所  
不便安而以戶口率置三老孝悌力田常員令各率其  
意以道民焉

十三年春二月甲寅詔曰朕親率天下農耕以供粢盛

皇后親桑以為祭服其具禮儀夏除祕祝以祕祝之官  
移過於下故也五月齊太倉令淳于公有罪當刑詔獄  
逮徒繫長安其少女緹縈自傷泣隨其父至長安上書  
願沒入為官婢贖父刑罪天子憐之為除肉刑六月詔  
除田租稅賜天下孤寡布帛絮各有數

十四年冬匈奴謀入邊為寇攻朝那塞殺北地都尉卬  
上乃遣三將軍軍隴西北地上郡中尉周舍為衛將軍  
郎中令張武為車騎將軍軍渭北車千乘騎卒十萬帝

親自勞軍勒兵申教令賜軍吏卒帝欲自將擊匈奴羣臣諫皆不聽皇太后固要帝帝乃止於是以東陽侯張相如為大將軍建成侯董赫內史欒布皆為將軍擊匈奴匈奴遁走春詔有司廣增諸祀壇場珪幣令祠官致敬毋有所祈福於朕

十五年春黃龍見成紀乃詔議郊祀魯人公孫臣上書言漢家得土地宜改正朔服色趙人新垣平以望氣見因說上設五廟于渭陽四月上幸雍始郊見五帝赦天

下修名山大川常祀而絕者有司以歲時致禮九月詔諸侯王公卿郡守舉賢良能正言極諫者上親策之傳納以言

十六年夏四月上郊祀五帝于渭陽五月立齊悼惠王子六人淮南厲王子三人皆為王九月得玉杯刻曰人主延壽令天下大酺明年改元

後元年冬十月新垣平詐覺謀反夷三族春正月孝惠皇后張氏薨詔曰間者歲比不登水旱頻仍丞相列侯

吏二千石博士議有可以佐百姓者率意遠思無有所  
隱

二年夏行幸雍棧陽宮六月代王參薨匈奴和親詔布  
告天下

三年春二月行幸代

四年夏四月丙寅晦日有蝕之五月赦天下免官奴婢  
為庶人行幸雍

五年春正月行幸隴西三月行幸雍秋七月行幸代

六年冬匈奴三萬騎入上郡三萬騎入雲中以中大夫  
令免為車騎將軍屯飛狐故楚相蘇意為將軍屯句注  
將軍張武屯北地河內太守周亞夫為將軍次細柳宗  
正劉禮為將軍次霸上祝茲侯徐厲為將軍次棘門以  
備胡夏四月大旱蝗令諸侯無入貢弛山澤減諸服御  
損郎吏員發倉庾以振民民得賣爵

七年夏六月己亥帝崩于未央宮年四十六遺詔曰朕  
聞之蓋天下萬物之萌生靡不有死死者天地之理物

之自然奚可甚哀當今之世咸嘉生而惡死厚葬以破業重服以傷生吾甚不取且朕既不德無以佐百姓今崩又使重服久臨以罹寒暑之數哀人父子傷長老之志損其飲食絕鬼神之祀以重吾不德謂天下何朕獲保宗廟以眇眇之身託于天下君王之上二十有餘年矣賴天之靈社稷之福方內安寧靡有兵革朕既不敏常畏過行以羞先帝之遺德惟年之久長懼于不終今乃幸以天年得復供養于高廟朕之不明與嘉之其奚



哀念之有其令天下吏民令到出臨三日皆釋服無禁  
娶婦嫁女祠祀飲酒食肉自當給喪事服臨者皆無踐  
經帶無過三寸無布車及兵器無發民男女哭臨宮殿  
中殿中當臨者皆以旦夕各十五舉音禮畢罷非旦夕  
臨時禁無得擅哭臨已下服大紅音功十五日小紅十四  
日纖七日釋服它不在令中者皆以此令比類從事布  
告天下使明知朕意霸陵山川因其故毋有所改歸夫  
人以下至少使令中尉亞夫為車騎將軍屬國悍為將

屯將軍郎中令張武為復土將軍發近縣卒萬六千人  
發內史卒萬五千人藏郭穿復土屬將軍武賜諸侯王  
以下至孝悌力田金錢各有數已葬霸陵羣臣皆頓  
首上尊號曰孝文皇帝班氏曰孝文皇帝即位二十三  
年宮室苑囿車騎服御無所增益有不便輒弛以利民  
嘗欲作露臺召匠計之直百金上曰百金中民十家之  
產吾奉先帝宮室常恐羞之何以臺為身衣弋綈所幸  
慎夫人衣不得曳地幃帳不得文繡以示敦朴為天下

先治霸陵皆以瓦器不得以金銀銅錫為飾因其山不起墳南越王尉佗自立為帝上召尉佗兄弟以德懷之佗遂去帝稱臣與匈奴約和親後而背約入盜令邊守備不發兵深入恐煩苦百姓吳王詐病不朝就賜几杖羣臣如袁盎等諫說雖切嘗假借納用焉張武等受賂遺金錢覺上乃發御府金錢賜之以愧其心弗下吏專務以德化民是以海內殷富興於禮義斷獄數百幾致刑措烏乎仁哉

孝文帝元年十六年後元年七年即位二十三年  
孝景皇帝名啓之字開文帝太子也母曰竇皇后後七  
年六月己亥文帝崩九日太子即皇帝位尊皇太后薄  
氏曰太皇太后皇后曰皇太后九月有星孛于西方

元年十月詔曰蓋聞古者祖有功而宗有德制禮樂各  
有由歌者所以發德也舞者所以明功也高廟酎奏武  
德文始五行之舞孝惠廟酎奏文始五行之舞孝文皇  
帝臨天下通闕梁不異遠方除誹謗去肉刑賞賜長老

收卹孤獨減耆欲不受獻罪人不孥不誅亡罪除宮刑  
出美人重絕人之世德厚侔天地利澤施四海靡不獲  
福明象乎日月而廟樂不稱朕甚懼焉其為孝文皇帝  
廟為昭德之舞以明休德然後祖宗之功德施于萬世  
永永無窮朕甚嘉之其與丞相列侯中二千石禮官具  
禮儀奏丞相臣嘉等奏曰陛下永思孝道立昭德之舞  
以明孝文皇帝之德皆臣嘉等愚所不及臣謹議曰功  
莫太於高皇帝德莫盛於孝文皇帝高皇帝廟宜為帝

者太祖之廟孝文皇帝廟宜為帝者太宗之廟天子宜  
世世獻祖宗之廟郡國諸侯宜各為孝文皇帝立太宗  
之廟諸侯王列侯使者侍祠天子所獻祖宗之廟請宣  
布天下制曰可春正月詔郡國或磽陁無所農桑蠶畜  
民欲徙寬大地者聽之夏四月赦天下賜民爵一級遣  
御史大夫青翟至代下與匈奴和親五月令田半租令  
羣臣無朝賀秋七月詔曰吏受所監臨以飲食免重受  
財物賤買貴賣論輕廷尉與丞相更議著令廷尉信謹

與丞相議曰吏及諸有秩受其官屬所監所治所行所  
將其與飲食計償費勿論它物若買故賤賣故貴皆坐  
臧為盜沒入臧縣官吏遷徙免罷受其故官屬所將監  
治送財物奪爵為士伍免之無爵罰金二斤令沒入所  
受有能捕告畀其所受臧

二月冬十二月有星孛于西南令天下男子二十始傅  
春三月立皇子德為河間王闕為臨江王餘為淮陽王  
非為汝南王彭祖為廣川王發為長沙王夏四月壬午

太皇太后崩六月丞相嘉薨封故相國蕭何孫係為列侯秋與匈奴和親

三月冬十二月襄平侯嘉子恢說不孝謀反欲以殺嘉大逆無道詔赦嘉為襄平侯及妻子當坐者復故爵論恢說及妻子如法春正月淮陽王宮正殿災吳王濞膠西王卬楚王戊趙王遂濟南王辟光菑川王賢膠東王雄渠皆舉兵反發兵西鄉天子為斬御史大夫鼂錯以謝七國大赦天下遣袁盎諭告不止遂西圍梁上乃遣



太尉周亞夫大將軍竇嬰將兵擊之二月壬子晦日有  
蝕之諸將破七國兵斬首十餘萬級追斬吳王濞於丹  
徒六王皆自殺夏六月詔諸吏民為吳王濞等所誑誤  
及逋逃亡軍者皆赦之又楚元王子敖等與濞等為逆  
朕不忍加法除其籍毋令汙宗室立平陸侯劉禮為楚  
王續元王後立皇子端為膠西王勝為中山王賜民爵  
一級

四年春復置諸關用傳出入夏四月己巳立皇子榮為

皇太子徹為膠東王六月赦天下賜民爵一級秋七月  
臨江王闕薨十月戊戌晦日有蝕之

五年春正月作陽陵邑夏募民徙陽陵賜錢二十萬遣  
公主嫁單于

六年冬十二月霖霖雨秋九月皇后薄氏廢

七年冬十一月庚寅晦日有蝕之春正月廢皇太子榮  
為臨江王二月罷太尉官夏四月立皇后王氏立膠東  
王徹為皇太子賜民為父後者爵一級

中元年夏四月赦天下賜民爵一級封故御史大夫周苛周昌孫子為列侯

二年春二月令諸侯王薨列侯初封及之國大鴻臚奏諡誄策列侯薨及諸侯太傅初除之官大行奏諡誄策王薨遣光祿大夫弔襚祠贈視喪事因立嗣子列侯薨遣太中大夫弔祠視喪事因立嗣其薨葬國得發民輓喪穿復土治墳無過三百人畢事匈奴入燕改磔曰棄市勿復磔三月臨江王榮坐侵太宗廟地徵詣中尉自

殺夏四月有星孛于西北立皇子越為廣川王寄為膠  
東王秋七月更郡守為太守郡尉為都尉九月封故楚  
趙傅相內史前死事者四人子為列侯甲戌晦日有蝕  
之

三年冬十一月罷諸侯御史大夫官春正月皇太后崩  
夏旱禁酤酒秋九月蝗有星孛于西北戊戌晦日有蝕  
之立皇子乘為清河王

四年春三月起德陽宮御史大夫綰奏禁馬高五尺九

寸以上齒未平不得出關夏蝗秋赦徒作陽陵者死罪  
欲腐者許之十月戊午日有蝕之

五年夏立皇子舜為常山王六月赦天下賜民爵一級  
秋八月己酉未央宮東闕災更名諸侯丞相為相九月  
詔諸獄疑若雖文致於法而人心不厭者輒讞之

六年冬十月行幸雍郊五畝十二月更官名命廷尉為  
大理將作少監為將作大匠主爵中尉為都尉長信詹  
事為長信少府將作為大長秋大行為行人奉常為太

常典客為大行治粟內史為大農以大內為二千石置左右內官屬大內定鑄錢偽黃金棄市律春三月雨雪夏四月梁王薨分梁為五國封孝王子五人為王五月詔曰夫吏者民之師也車駕衣服宜稱吏六百石以上皆長吏也亡度者或不吏服出入閭里與民亡異令長吏二千石車朱兩轡千石至六百石朱左轡車騎從者不稱其官衣服下吏出入閭巷亡吏體者二千石上其官屬三輔舉不如法令者皆上丞相御史請之又詔酷

吏奉憲失中令有司減笞法定華令六月匈奴入鴈門  
至武泉入上郡取苑馬秋七月辛亥晦日有蝕之

後元年冬更命中大夫為衛尉春正月詔獄疑者讞有  
司有司有所不能決移廷尉有令讞而後不當讞者不  
為失欲令治獄者務先寬三月赦天下賜民爵一級中  
二千石諸侯相爵右庶長夏大酺五日民得酤酒五月  
地震秋七月乙巳晦日有蝕之條侯周亞夫下獄死

二年冬省徹侯之國春匈奴入鴈門太守馮敬與戰死

發車騎材官屯以歲不登令內史郡不得食馬粟徒隸衣七縷布夏四月詔曰雕文刻鏤傷農事者也錦繡纂組害女紅者也朕親耕后親桑以奉宗廟粢盛祭服為天下先不受獻減太官省繇賦欲天下務農蠶素有畜積以備災害今歲或不登民食頗寡其咎安在或詐偽為吏吏以貨賂為市漁奪百姓侵牟萬民縣丞長吏也奸法與盜盜甚無謂也其令二千石各修其職不事官職耗亂者丞相以聞請其罪五月詔曰人不患其不知



患其為詐也不患其不勇患其為暴也不患其不富患其亡厭也其唯廉士寡欲易足今訾與訾同算萬錢為一算十以上乃得官廉士算不必衆有市籍不得官無訾又不得官朕甚愍之訾算四得官亡令廉士久失職貪夫長利秋大旱

三年春正月詔令郡國務勸農桑益種樹吏發民若取庸采黃金珠玉坐贓為盜二千石聽者與同罪又詔八歲已下八十已上及孕子未乳當鞠繫者並頌音容繫之

皇太子冠賜民為父後者爵一級甲子帝崩于未央宮  
年四十八遺詔賜諸侯王列侯馬二駟吏二千石黃金  
二斤吏民戶百錢出宮人歸其家復終身二月癸酉葬

陽陵

陵在長安東北四十五里

荀悅曰自漢初務本勸農累世承業

至是始天下富庶家給人足京師之錢累百巨億貫朽  
而不可校太倉之粟充實露積於外腐敗而不可食衆  
庶街巷有馬阡陌之間成羣守閭閻者食梁肉為吏者  
長子孫居官者以官為姓號人人自愛而不犯法仁義

興焉

景帝初元七年中元六年後元三年即位十六年  
臣謹按張晏曰自景帝至平帝本紀皆王莽時劉歆  
揚雄馮衍史岑等所記惟武帝紀遷沒其書殘缺褚  
少孫補之所謂褚先生是也

孝武皇帝名徹之字通景帝中子也母曰王美人年四  
歲立為膠東王孝景七年廢太子榮為臨江王以膠東  
王為皇子王美人為皇后後三年春正月景帝崩太子

即皇帝位尊皇太后竇氏曰太皇太后皇后曰皇太后  
三月尊太后母臧兒為平原君封太后同母弟田蚡勝  
皆為列侯

建元元年

自古帝王未有年號始起於此

冬十月詔丞相御史列侯中

二千石二千石諸侯相舉賢良方正直言極諫之士丞

相綰奏所舉賢良或治申商韓非蘇秦張儀之言亂國

政請皆罷奏可春二月赦天下賜民爵一級年八十復  
二算九十復甲卒行三銖錢夏四月己巳詔民年九十

以上已有受鬻法為復子若孫令得身率妻妾遂其供養之事五月令祠官修山川之祠為歲事赦吳楚七國帑輸在官者秋七月詔省衛士卒萬人罷苑馬以賜貧民議立明堂遣使者安車蒲輪徵魯申公

二年冬十月御史大夫趙綰坐請毋奏事太皇太后及郎中令王臧皆下獄自殺丞相嬰太尉蚡免春二月丙戌朔日有蝕之夏四月戊申有如日夜出初置茂陵邑三年春河水溢于平原大飢人相食賜徙茂陵者戶錢

二十萬田二頃初作便門橋秋七月有星孛于西北濟川王明坐殺太傅中傅廢遷防陵閩越圍東甌東甌告急遣中大夫嚴助持節發會稽兵浮海救之未至閩越走兵還九月丙子晦日有蝕之

四年夏有風赤如血六月旱秋有星孛于東北

五年春罷三銖錢行半兩錢置五經博士夏四月平原君薨五月大蝗秋八月廣川王越清河王乘皆薨

六年春二月乙未遼東高廟災夏四月壬子高園便殿

火上素服五日五月丁亥太皇太后崩秋八月有星孛于東方長竟天閩越王郢攻南越遣大行高恢將兵出豫章大司農韓安國出會稽擊之未至越人殺郢降兵還

元光元年冬十一月初令郡國舉孝廉各一人衛尉李廣為驍騎將軍屯雲中中尉程不識為車騎將軍屯鴈門六月罷夏四月赦天下賜民長子爵一級復七國宗室前絕屬者五月詔舉賢良天子親策問之而覽其對

於是董仲舒公孫弘之徒出焉秋七月癸未日有蝕之  
二年冬十月行幸雍祠五時春詔問公卿欲攻單于之  
要大行王恢建議宜擊夏六月御史大夫韓安國為護  
軍將軍衛尉李廣為驍騎將軍太僕公孫賀為輕車將  
軍大行王恢為將屯將軍太中大夫李息為材官將軍  
將三十萬衆屯馬邑谷中誘致單于欲襲擊之單于入  
塞覺之走出六月軍罷將軍王恢坐首謀不進下獄死  
秋九月令民大酺五日



三年春河水徙從頓邱東南流入渤海夏五月封高祖功臣五人後為列侯河水決濮陽汜郡十六發卒十萬救決河起龍淵宮

四年冬魏其侯竇嬰有罪棄市春三月乙卯丞相蚡薨夏四月隕霜殺草五月地震赦天下

五年春正月河間王德薨夏發巴蜀治南夷道又發卒治鴈門阻險秋七月大風拔木乙巳皇后陳氏廢捕為巫蠱者皆梟首八月螟徵吏民有明當世之務習先聖

之術者縣次給食令與計偕

六年冬初算商車春穿漕渠通渭匈奴入上谷殺略吏  
民遣車騎將軍衛青出上谷騎將軍公孫敖出代輕車  
將軍公孫賀出雲中驍騎將軍李廣出鴈門青至龍城  
獲首虜七百級廣敖失師而還詔書切責敖廣等而赦  
其軍士夏大旱蝗六月行幸雍秋匈奴盜邊遣將軍韓  
安國屯漁陽

元朔元年冬十一月詔曰十室之邑必有忠信三人並

行厥有我師朕深詔執事興廉舉孝庶幾成風今或至  
闔郡而不薦一人是化不下究而積行之君子壅於上  
聞也二千石官長紀綱人倫將何以佐朕勸元元厲蒸  
庶崇鄉黨之訓哉且進賢受上賞蔽賢蒙顯戮古之道  
也其與二千石禮官博士議不舉者罪有司奏議曰古  
者諸侯貢士壹適謂之好德再適謂之賢賢三適謂之  
有功乃加九錫不貢士壹則黜爵再則黜地三則黜爵  
地畢矣夫附下罔上者死附上罔下者刑與聞國政而

亡益於民者斥在上位不能進賢者退此所以勸善黜惡也今詔書令二千石舉孝廉所以化元元移風俗也不舉孝不奉詔當以不敬論不察廉不勝任也當免奏可十二月江都王非薨春三月甲子立皇后衛氏詔赦天下與民更始秋匈奴入遼西殺太守入漁陽鴈門敗都尉殺三千餘人遣將軍衛青出鴈門將軍李息出代獲首虜數千級東夷歲君南閭等口二十八萬人降為蒼海郡魯王餘長沙王發皆薨

二年冬賜淮南王菑川王几杖毋朝春正月詔令諸侯  
王得以邑土分子弟於是梁王城陽王願以邑分弟於  
是藩國始分而子弟畢侯矣匈奴入上谷漁陽殺略吏  
民千餘人遣將軍衛青李息出雲中至高闕遂西至符  
離獲首虜數千級收河南地置朔方五原郡三月乙亥  
晦日有蝕之夏募民徙朔方十萬口又徙郡國豪傑及  
訾三百萬呂上于茂陵秋燕王定國有罪自殺

三年春罷蒼海郡三月詔赦天下夏匈奴入代殺太守

入鴈門殺略千餘人六月庚午皇太后崩秋罷西南夷城朔方令民大酺五日

四年冬行幸甘泉夏匈奴入代定襄上郡殺略千餘人五年春大旱大將軍衛青將六將軍兵十餘萬人出朔方高闕獲首虜萬五千級夏六月詔興禮樂丞相弘請為弟子置博士員學者益廣秋匈奴入代殺都尉

六年春二月大將軍衛青將六將軍兵十餘萬騎出定襄斬首三千餘級還休士馬于定襄雲中鴈門赦天下

夏四月衛青復將六將軍絕幕大克獲前將軍趙信軍  
敗降匈奴右將軍蘇建亡軍獨身脫還贖為庶人六月  
詔軍士比多克獲受爵賞而欲移賣者無所流貶其議  
為令有司奏請置武功賞官以寵戰士

元狩元年冬十月行幸雍祠五畤獲白麟作白麟之歌  
十一月淮南王安衡山王賜謀反誅黨與死者數萬人  
十二月大雨雪民凍死夏四月赦天下丁卯立皇太子  
賜中二千石爵右庶長民為父後者一級詔赦天下遣

謁者巡行天下賜縣三老孝者帛人五匹鄉三老弟者  
力田帛人三匹年九十以上及鰥寡孤獨帛人二匹絮  
三斤八十以上米人三石有寃失職使者以聞縣鄉即  
賜毋贅聚五月乙巳晦日有蝕之匈奴入上谷殺數百  
人

二年冬十月行幸雍祠五時春三月丞相弘薨遣驃騎  
將軍霍去病出隴西至臯蘭斬首八千餘級夏馬生余  
吾水中南越獻馴象能言烏將軍去病公孫敖出北地



二千餘里過居延斬首虜三萬餘級匈奴入鴈門殺略數百人遣衛尉張騫郎中令李廣皆出右北平廣殺匈奴三千餘人盡亡其軍四千人獨身脫還及公孫敖張騫皆後期當斬贖為庶人江都王建有罪自殺膠東王寄薨秋匈奴昆邪王殺休屠王并將其衆合四萬餘人來降置五屬國以處之以其地為武威酒泉郡

三年春有星孛于東方夏五月赦天下立膠東康王少子慶為六安王封故相國蕭何曾孫慶為列侯秋匈奴

入右北平定襄殺略千餘人遣謁者勸有水災郡種宿  
麥舉吏民能假貸貧民者以名聞減隴西北地上郡戍  
卒半發謫吏穿昆明池

四年冬有司言關東貧民徙隴西北地西河上郡會稽  
凡七十二萬五千口縣官衣食振業用度不足請收銀  
錫造白金及皮幣以足用初算緡錢春有星孛于東北  
夏有長星出于西北大將軍衛青將四將軍出定襄將  
軍去病出代各將五萬騎步兵踵軍後數十萬人青至

幕北圍單于斬首萬九千級至闐顏山乃還去病與左  
賢王戰斬首虜七萬餘級封狼居胥山廼還兩軍士死  
者數萬人前將軍廣後將軍食其皆後期廣自殺食其  
贖死

五年春三月甲午丞相李蔡有罪自殺天下馬少平牡  
馬匹二十萬罷半兩錢行五銖錢徙天下姦猾吏民於  
邊

六年冬十月賜丞相以下至吏二千石百金千石以下

至乘從者帛蠻夷錦各有差雨水亡冰夏四月己巳廟  
立皇子閔為齊王旦為燕王胥為廣陵王初作誥六月  
詔遣博士大等六人分循行天下存問鰥寡廢疾無以  
自振業者貸與之諭三老孝弟以為民師舉獨行之君  
子徵詣行在所秋九月大司馬驃騎將軍去病薨

元鼎元年夏五月赦天下大酺五日得鼎汾水上濟東  
王彭離有罪廢徙上庸

二年冬十一月御史大夫張湯有罪自殺十二月丞相

青翟下獄死春起栢梁臺三月大雨雪夏大水關東餓死者以千數秋九月詔江南水潦下巴蜀之粟致之江陵遣博士中等分循行諭告所抵無令重困吏民有振救飢民免其厄者具舉以聞

三年冬徙函谷關於新安以故關為弘農縣十一月令民告緡者以其半與之正月戊子陽陵園火夏四月雨雹關東郡國十餘飢人相食常山王舜薨子敖嗣立有罪廢徙房陵

四年冬十月行幸雍祠五時賜民爵一級女子百戶牛  
酒行自夏陽東幸汾陰十一月甲子立后土祠于汾陰  
睢上禮畢行幸滎陽還至洛陽詔求周後得孽子嘉封  
為周子南君以奉周祀春二月中山王勝薨夏封方士  
樂大為樂通侯位上將軍六月得寶鼎后土祠旁秋馬  
生渥洼水中作寶鼎天馬之歌立常山憲王子商為泗  
水王

五年冬十月行幸雍祠五時遂踰隴登空同西臨祖厲

河而還十一月辛巳朔旦冬至立泰時于甘泉天子親郊見朝日夕月詔以是月望見泰一修天文禮乃辛卯夜若景光十有二明丁酉拜況于郊夏四月南越王相呂嘉反殺漢使者及其王王太后赦天下丁丑晦日有蝕之秋鼃蝦蟆鬬遣伏波將軍路博德出桂陽下湟水樓船將軍楊僕出豫章下潯水歸義侯越嚴為戈船將軍出零陵下灘水甲為下潏將軍下蒼梧皆將罪人江淮以南樓船十萬人越馳義侯遺別將巴蜀罪人發夜郎

兵下牂柯江咸會番禺九月列侯坐獻黃金酎祭宗廟  
不如法奪爵者六百人丞相趙周下獄死樂通侯樂大  
坐巫罔要斬西羌衆十萬人反與匈奴通使攻故安圍  
枹罕匈奴入五原殺太守

六年冬十月發隴西天水安定騎士及中尉河南河內  
卒十萬人遣將軍李息郎中令徐自為征西羌平之行  
東將幸緱氏至左邑桐鄉聞南越破以為聞喜縣春至  
汲新中鄉得呂嘉首以為獲嘉縣馳義侯遺兵未及下



上便令征西南夷平之遂定越地以為南海蒼梧鬱林  
合浦交趾九真日南珠厓儋耳郡定西南夷以為武都  
牂柯越雋沈黎文山郡秋東越王餘善反攻殺漢將吏  
遣橫海將軍韓說中尉王溫舒出會稽樓船將軍楊僕  
出豫章擊之又遣浮沮將軍公孫賀出九原匈奴河將軍  
趙破奴出令居皆二千餘里不見虜而還乃分武威酒  
泉地置張掖敦煌郡徙民以實之

元封元年冬十月詔曰南越東甌咸伏其辜西蠻北夷

頗未輯睦朕將巡邊垂擇兵振旅躬秉武節置十二部將軍親帥師焉行自雲陽北歷上郡西河五原出長城北登單于臺至朔方臨北河勒兵十八萬騎旌旗徑千餘里威震匈奴遣使者郭吉告單于曰南越王頭已縣於漢北闕矣單于能戰天子自將待邊不能亟來臣服何但亡匿幕北寒苦之地為匈奴讐焉單于怒囚吉然終不敢出上還祠黃帝於橋山乃歸甘泉東越殺王餘善降詔以東越險阻反覆為後世患遷其民於江淮間

遂虛其地春正月行幸緱氏詔曰朕用事華山至于中  
嶽獲駁麋見夏后啓母石翌日親登崇高御史乘屬在  
廟旁吏卒咸聞呼萬歲者三登禮罔不答其令祠官加  
增太室祠禁無伐其草木以山下三百戶為之奉邑名  
曰崇高獨給祠復亡所與行遂東巡海上夏四月癸卯  
上還登封泰山降坐明堂詔與士夫更始以十月為元  
封元年行所巡至博奉高蛇音移邱歷城梁父民田租逋  
賦貸已除加年七十以上及孤寡帛人二匹四縣毋出

今年租算賜天下民爵一級女子百戶牛酒行自泰山復東巡海上至碣石自遼西歷北邊九原五月歸于甘泉秋有星孛于東井又孛于三台齊王閔薨

臣謹按劉氏按封禪書云其後三年有司言改元宜以天瑞命不宜以一二數推其所謂後三年者蓋盡元狩六年至元鼎三年也然元鼎四年方得寶鼎又無緣三年而稱之以此而言自元鼎以前之元皆有司所追命其實年號之起在元鼎耳故元封改元始

有詔書

臣又按劉氏以元封改元始有詔書前此之元皆無也然元鼎元年五月得鼎汾水上所以改元為得此鼎非為四年所得之鼎也誠哉改元之號在後而追號前年以足武帝之始

二年冬十月行幸雍祠五畤春幸緱氏遂至東萊夏四月還祠泰山至瓠子臨決河命從臣將軍以下皆負薪塞河隄赦所過徒賜孤獨高年米人四石作瓠子之歌

還作甘泉通天臺長安飛廉館朝鮮王攻殺遼東都尉  
廼募天下死罪擊朝鮮六月詔以甘泉宮內中產芝九  
莖連葉赦天下賜雲陽都百戶牛酒作芝房之歌秋作  
明堂于泰山下遣樓船將軍楊僕左將軍荀彘將應募  
罪人擊朝鮮又遣將軍郭昌中郎將衛廣發巴蜀兵平  
西南夷未服者以為益州郡

三年春作角抵戲以享外國朝獻者三百里內皆來觀  
夏朝鮮斬其王右渠降以其地為樂浪臨屯元菟真番

郡樓船將軍楊僕坐失亡多免為庶人左將軍荀彘坐爭功棄市秋七月膠西王端薨武都氐人反分徙酒泉郡

四年冬十月行幸雍祠五時通回中道遂北出蕭關歷獨鹿鳴澤自代而還幸河東春三月祠后土有神光集于靈壇一夜三燭幸中都宮殿上見光詔赦汾陰夏陽中都死罪以下賜三縣及楊氏皆無出今年租賦夏大旱民多暍死秋以匈奴弱可遂臣服乃遣使說之單于

使來死京師匈奴寇邊遣拔胡將軍郭昌屯朔方

五年冬行南巡狩至于盛唐望祀虞帝于九嶷登瀟天  
柱山自尋陽浮江親射蛟江中獲之舳艫千里薄撝陽  
而出作盛唐撝陽之歌遂北至琅邪並海所過禮祠其  
名山大川春三月還至泰山增封甲子祠高祖于明堂  
以配上帝因朝諸侯王列侯受郡國計夏四月詔赦天  
下所幸縣毋出今年租賦賜鰥寡孤獨帛貧窮者粟還  
幸甘泉郊泰畤大司馬大將軍青薨初置刺史部十三



州名臣文武欲盡詔曰蓋有非常之功必待非常之人故馬或奔蹏而致千里士或有負俗之累而立功名夫泛駕之馬跡弛之士亦在御之而已其令州郡察吏民有茂材異等可為將相及使絕國者

六年冬行幸回中春作首山宮三月行幸河東祠后土詔赦汾陰殊死以下賜天下貧民布帛人一匹益州昆明反赦京師亡命令從軍遣拔胡將軍郭昌將以擊之夏京師民觀角抵于上林平樂館秋大旱蝗

太初元年冬十月行幸泰山十一月甲子朔旦冬至祀  
上帝于明堂乙酉栢梁臺災十二月禋高里祠后土東  
臨勃海望祠蓬萊春還受計于甘泉二月起建章宮夏  
五月正歷用夏正以正月為歲首色上黃數用五定官  
名協音律遣因杆匈奴地名因所征以杆羽俱切將軍公孫敖築  
塞外受降城秋八月行幸安定遣貳師將軍李廣利發  
天下謫民西征大宛蝗從東方飛至敦煌

二年春正月丞相慶薨三月行幸河東祠后土令天下

大酺五日。臘五日祠門戶。比臘夏四月詔曰朕用事介  
山祭后土皆有光應其赦汾陰安邑殊死以下五月籍  
吏民馬補車騎。馬秋蝗遣浚稽將軍趙破奴二萬騎出  
朔方擊匈奴不還。冬十二月御史大夫兒寬卒。

三年春正月行東巡海上。夏四月還修封泰山禪石閭。  
遣光祿勳徐自為築五原塞外列城西北至盧朐游擊  
將軍韓說將兵屯之。彊弩都尉路博德築居延秋匈奴  
入定襄雲中殺略數千人行壞光祿諸亭障又入張掖。

酒泉殺都尉

四年春貳師將軍廣利斬大宛王首獲汗血馬來作西極天馬之歌秋起明光宮冬行幸回中徙弘農都尉治武關稅出入者以給關吏卒食

天漢元年春正月行幸甘泉郊泰畤三月行幸河東祠后土匈奴歸漢使者使使來獻夏五月赦天下秋閉城門大搜發謫戍屯五原

二年春行幸東海還幸回中夏五月貳師將軍三萬騎

出酒泉與右賢王戰于天山斬首虜萬餘級又遣因杆將軍出西河騎都尉李陵將步卒五千人出居延北與單于戰斬首虜萬餘級陵兵敗降匈奴秋止禁巫祠道中者大搜渠黎六國遣使來獻泰山琅邪羣盜徐勃等阻山攻城道路不通遣直指使者暴勝之等衣繡衣杖斧分部逐捕刺史郡守以下皆伏誅十一月詔闕都尉曰今豪傑多遠交依東方羣盜其謹察出入者

三年春二月御史大夫王卿有罪自殺初榷酒酤三月

行幸泰山修封祀明堂因受計還幸北地祠常山瘞元  
玉夏四月赦天下行所過毋出田租秋匈奴入鴈門太  
守坐畏愞棄市

四年春正月朝諸侯王于甘泉宮發天下七科謫及勇  
敢士遣貳師將軍李廣利將六萬騎步兵七萬人出朔  
方因杆將軍公孫敖萬騎步兵三萬人出鴈門游擊將  
軍韓說步兵三萬人出五原彊弩都尉路博德步兵萬  
餘人與貳師會廣利與單于戰余吾水上連日敖與左

賢王戰不利皆引還夏四月立皇子臯音博為昌邑王秋

九月令死罪人贖錢五十萬減死一等

太始元年春正月因杆將軍赦有罪要斬徙郡國吏民  
豪桀于茂陵雲陵夏六月赦天下

二年春正月行幸回中三月詔改名黃金為麟趾裏蹠  
以協瑞焉因以班賜諸侯王秋旱九月募死罪人贖錢  
五十萬減死一等御史大夫杜周卒

三年春正月行幸甘泉宮饗外國客二月令天下大酺

五日行幸東海獲赤鴈作朱鴈之歌幸琅邪禮日成山  
登之罘浮大海山稱萬歲冬賜行所過戶五千錢鰥寡  
孤獨帛人一匹

四年春三月幸泰山壬午祀高祖于明堂以配上帝因  
受計癸未祀孝景帝于明堂甲申修封丙戌禮石閭夏  
四月幸不其祠神人于交門宮若有鄉坐拜者作交門  
之歌夏五月還幸建章宮赦天下秋七月趙有蛇從郭  
外入邑與邑中蛇羣鬪孝文廟下邑中蛇死冬十月甲



寅晦日有蝕之十二月行幸雍祠五時西至安定北地  
征和元年春正月還幸建章宮三月趙王彭祖薨冬十  
一月發三輔騎士大搜上林閉長安城門索十一日乃  
解巫蠱起

二年春正月丞相賀下獄死夏四月大風發屋折木閏  
月諸邑公主

諸邑琅邪縣也

陽石公主皆坐巫蠱死夏行幸甘

泉秋七月按道侯韓說使者江充掘蠱太子宮壬午太  
子與皇后謀斬充以節發兵與丞相劉屈氂大戰長安

死者數萬人庚寅太子亡皇后自殺初置城門屯兵更節加黃旄御史大夫暴勝之司直田仁坐失縱勝之自殺仁要斬八月辛亥太子自殺于湖癸亥地震九月立趙敬肅王子偃為平干王匈奴入上谷五原殺略吏民三年春正月行幸雍至安定北地匈奴入五原酒泉殺南都尉三月遣貳師將軍廣利將五萬人出五原御史大夫商邱成二萬人出西河重合侯馬通四萬騎出酒泉成至浚稽山與虜戰多斬首通至天山虜引去因降

車師皆引兵還廣利敗降匈奴夏五月赦天下六月丞相屈氂下獄要斬妻子梟首秋蝗九月反者公孫勇胡倩發覺皆伏辜

四年春正月行幸東萊臨大海二月丁酉隕石于雍二聲聞四百里三月上耕于鉅定還幸泰山修封庚寅祀于明堂癸巳禋石閭夏六月還幸甘泉秋八月辛酉晦日有蝕之

後元元年春正月行幸甘泉郊泰畤遂幸安定昌邑王

髡薨二月詔以郊見上帝薦于泰時光景並見其赦天  
下夏六月御史大夫商邱成有罪自殺侍中僕射莽何  
羅與弟重合侯通謀反侍中駙馬都尉金日磾奉車都  
尉霍光騎都尉上官桀討之秋七月地震往往涌泉出  
二年春正月朝諸侯王于甘泉宮賜宗室二月行幸盩  
厔五柞宮上疾篤乙丑立皇子弗陵為皇太子丁卯帝  
崩于五柞宮入殯于未央宮前殿三月甲申葬茂陵

長安

西北  
八十里

年七十一班固曰漢承百王之弊高祖撥亂反

正文景務在養民至于稽古禮文之事猶多闕焉孝武  
初立卓然罷黜百家表章六經遂疇咨海內舉其茂俊  
與之立功興大學修郊祀改正朔定歷數協音律作詩  
樂建封禪禮百神紹周後號令文章煥然可述後嗣得  
遵洪業而有三代之風如武帝之雄材大略不改文景  
之恭儉以濟斯民雖詩書所稱何有加焉

孝武帝建元元光元朔元狩元鼎元封各六年太  
初天漢太始征和各四年後元二年即位五十四

年

孝昭皇帝名弗陵之字不武帝少子也母曰趙婕妤居  
鉤弋宮號鉤弋夫人孕十四月而生帝時武帝年七十  
矣欲立之為太子患其年穉母少恐女主顓恣故婕妤  
以微譴死武帝末戾太子敗燕王旦廣陵王胥行驕嫚  
後元二年二月武帝疾病遂立昭帝為太子年八歲以  
侍中奉車都尉霍光為大司馬大將軍受遺詔輔少主  
丁卯帝崩戊辰太子即皇帝位謁高廟帝姊鄂邑長公

主共養省中大將軍光東政領尚書事車騎將軍金日磾左將軍上官桀副焉夏六月赦天下秋七月有星孛於北方濟北王寬有罪自殺賜長公主及宗室昆弟各有差追尊趙婕妤為皇太后起雲陵冬匈奴入朔方殺略吏民發軍屯西河左將軍桀行北邊

始元元年春二月黃鵠下建章宮太液池中公卿上壽賜諸侯王列侯宗室金錢各有差己亥上耕于鉤盾弄田益封燕王廣陵王及鄂邑長公主各萬三千戶夏為

太后起園廟雲陵益州廉頭姑繒牂柯談指同並

音二伴

十四邑皆反遣水衡都尉呂破胡募吏民及發犍為蜀  
郡奔命擊益州大破之有司請河內屬冀州河東屬并  
州秋七月赦天下賜民百戶牛酒大雨渭橋絕八月齊  
孝王孫劉澤謀反欲殺青州刺史雋不疑發覺皆伏誅  
遷不疑為京兆尹賜錢百萬九月丙子車騎將軍日磾  
薨閏月遣故廷尉王平等五人持節行郡國舉賢良問  
民疾苦冤失職者冬無冰



二年春正月大將軍光左將軍桀皆以前捕斬反虜重  
合侯馬通功封光為博陸侯桀為安陽侯以宗室母在  
位者舉茂材劉辟彊劉長樂皆為光祿大夫辟彊守長  
樂衛尉三月遣使者振貸貧民毋種食者秋八月詔往  
年災害多今年蠶麥傷所振貸種食勿收責毋令出今  
年田租冬發習戰射士詣朔方調故吏將屯田張掖郡  
三年春二月有星孛于西北秋募民徙雲陵賜錢田宅  
冬十月鳳凰集東海遣使者祠其處十一月壬辰朔日

有蝕之

四年春三月甲寅立皇后上官氏赦天下辭訟在後二  
年前皆勿聽治夏六月皇后見高廟賜長公主丞相將  
軍列侯中二千石以下及郎吏宗室錢帛各有差徙三  
輔富人雲陵賜錢戶十萬秋七月詔以比歲不登往時  
令民共出馬其止勿出諸給中都官者且減之冬遣大  
鴻臚田廣明擊益州廷尉李种坐放縱死罪棄市

五年春正月追尊皇太后父為順成侯夏陽男子張延

年

一作  
成方

詣北闕自稱衛太子誣罔要斬夏罷天下亭母

馬及馬弩闕六月封皇后父驃騎將軍上官安為桑樂

侯詔曰朕修古帝王之事通保傳傳孝經論語尚書未

云有明其令三輔太常舉賢良各二人郡國文學高第

各一人賜中二千石以下至吏民爵各有差罷詹耳真

番郡秋大鴻臚廣明軍正王平擊益州斬首捕虜三萬

餘頭

六年春正月上耕于上林二月詔有司問郡國所舉賢

良文學民所疾苦議罷鹽鐵榷酤移中監蘇武前使匈奴留單于庭十九年乃還奉使全節以武為典屬國賜錢百萬夏旱大雩不得舉火秋七月罷榷酤官令民得以律占租賣酒升四錢以邊塞闊遠取天水隴西張掖郡各二縣置金城郡鉤町侯毋波助漢擊反者有功詔立毋波為鉤町王大鴻臚廣明將率有功賜爵關內侯食邑

元鳳元年春長公主共養勞苦復以藍田益長公主湯

沐邑泗水戴王前薨以母嗣國除後宮有遺腹子煖許遠

反

相內史不奏言上聞而憐之立煖為泗水王相內史

皆下獄三月賜郡國所選有行義者涿郡韓福等五人

帛人五十匹遣歸詔曰朕閔勞以官職之事其務修孝

悌以教鄉里令郡縣常以正月賜羊酒有不幸者賜衣

被一襲祠以中牢武都氐人反遣執金吾馬適建姓馬適名

建

龍頡侯

頡音洛

韓增大鴻臚廣明將三輔太常徒皆免

刑擊之夏六月赦天下秋七月乙亥晦日有蝕之既八

月改始元為元鳳九月鄂邑長公主燕王旦與左將軍  
上官桀桀子驃騎將軍安御史大夫桑弘羊皆謀反伏  
誅初桀安父子與大將軍光爭權欲害之詐使人為燕  
王旦上書言光罪時上年十四覺其詐後有譖光者上  
輒怒曰大將軍國家忠臣先帝所屬敢有譖毀者坐之  
光由是得盡忠語在燕王霍光傳冬十月詔曰左將軍  
安陽侯桀驃騎將軍桑樂侯安御史大夫弘羊皆數以  
邪枉干輔政大將軍不聽而懷怨望與燕王通謀燕王

遣壽西長孫縱之

壽西姓長名孫姓縱之名

賂遺長公主丁外人謁

者杜延年大將軍長史公孫遺等交通私書共謀令長公主置酒伏兵殺大將軍光徵立燕王為天子大逆母道故稻田使者燕倉先發覺以告大司農敞敞告諫大夫延年延年以聞丞相徵事任宮手捕斬桀丞相少史王壽誘將安入府門皆已伏誅吏民得以安封延年倉宮壽皆為列侯又曰燕王迷惑失道前與齊王子劉澤等為逆抑而不揚望王反道自新今乃與長公主及左

將軍桀等謀危宗廟王及公主皆自伏辜其赦王太子建公主子文信及宗室子與燕王上官桀等謀反父母同產當坐者皆免為庶人其吏為桀等所誣誤未發覺在吏者除其罪

二年夏四月上自建章宮徙未央宮大置酒賜郎從官帛及宗室子錢人二十萬吏民獻牛酒者賜帛人一匹六月赦天下詔曰朕閔百姓未贍前年減漕三百萬石頗省乘輿馬及苑馬以補邊郡三輔傳馬其令郡國毋



欽今年馬口錢三輔太常得以收粟當賦

三年春正月泰山有大石自起立上林有柳樹枯僵自起生罷中牟苑賦貧民詔曰乃者民被水災頓匱於食朕虛倉廩使使者振困乏其止四年毋漕三年以前所振貸非丞相御史所請邊郡受牛者勿收責夏四月少府徐仁廷尉王平左馮翊賈勝胡皆坐縱反者仁自殺平勝皆要斬冬遼東烏桓反以中郎將范明友為度遼將軍將北邊七郡二千騎擊之

四年春正月丁亥帝加元服見于高廟賜諸侯王丞相  
大將軍列侯宗室下至吏民金帛牛酒各有差賜中二  
千石以下及天下民爵毋收四年五年口賦三年以前  
逋更賦未入者皆勿收令天下酺五日甲戌丞相千秋  
薨夏四月詔度遼將軍明友前擊益州反虜後擊武都  
反氐及今破烏桓皆有功封為平陵侯平樂監傳介子  
持節使誅斬樓蘭王安歸首縣北闕封義陽侯五月丁  
丑孝文廟正殿火上及郡臣皆素服發中二千石將五

校作治六日成太常及廟令丞郎吏皆劾大不敬會赦  
太常轅陽侯德免為庶人六月赦天下

五年春正月廣陵王來朝益國萬一千戶賜錢二十萬  
黃金二百斤劔二安車一乘馬二駟夏大旱六月發三  
輔及郡國惡少年吏有告劾亡者屯遼東秋罷象郡分  
屬鬱林牂柯冬十一月大雷十二月庚戌丞相訢薨

六年春正月募郡國徒築遼東元菟城夏赦天下詔曰  
夫穀賤傷農今三輔穀減賤其令以叔粟當今年賦右

將軍張安世宿衛忠勤封富平侯烏桓復犯塞遣度遼將軍范明友擊之

元平元年春二月詔減口賦錢有司奏請減什三上許之甲申晨有流星大如月衆星皆隨西行夏四月癸未

帝崩于未央宮六月壬申葬平陵

在長安西北七十里

年二十二

班固曰孝昭以幼年即位而知燕蓋上官逆黨之詐不疑霍光委任以政當孝武奢侈餘弊師旅之後海內虛耗戶口減半光知時務之要輕繇薄賦與民休息至始

元元鳳之間匈奴和親百姓充實舉賢良文學問民所疾苦議鹽鐵而罷榷酤尊號曰昭不亦宜乎

孝昭帝始元元鳳各六年元平元年即位十三年孝宣皇帝初名病已元康二年更名詢之字謀武帝曾孫戾太子孫也太子納史良娣生史皇孫皇孫納王夫人生宣帝號曰皇曾孫生數月遭巫蠱事太子良娣皇孫王夫人皆遇害惟餘曾孫一人曾孫雖在襁褓猶坐收繫郡邸獄丙吉為廷尉監治巫蠱於郡邸愍曾孫之

無辜使女徒復作淮陽趙徵卿渭城胡組更乳養私給  
衣食視遇甚有恩巫蠱事連歲不決至後元二年武帝  
疾往來長楊五柞宮望氣者言長安獄中有天子氣上  
遣使者分條中都官獄繫者輕重皆殺之內謁者令郭  
穰夜至郡邸獄吉拒閉使者曰皇曾孫在此他人無辜  
死猶不可況曾孫乎使者自夕至明不得入因劾奏吉  
武帝亦悟曰天使之然也乃赦天下吉乃載曾孫送祖  
母史良娣家後有詔掖庭養視上屬籍宗正時掖庭令

張賀嘗事戾太子思顧舊恩哀曾孫奉養曾孫甚謹以

私錢供給教書既壯為取暴室嗇夫許廣漢女曾孫因

依倚廣漢兄弟及祖母家史氏受詩於東海瀆音馱中翁

高材好學亦喜游俠鬪雞走馬具知閭里姦邪吏治得

失數上下諸陵周徧三輔嘗困於蓮勺音輦鹵中尤樂

杜鄴之間率常在下杜時會朝請舍長安尚冠里身足

下有毛卧居數有光耀每買餅所從買家輒大讎音售亦

以是自怪元平元年四月昭帝崩無嗣大將軍霍光請

皇后徵昌邑王賀六月丙寅賀受皇帝璽綬尊皇后曰  
皇太后賀淫亂不君即位凡二十七日光白皇太后廢  
之秋七月光奏議曰禮人道親親故尊祖尊祖故敬宗  
大宗無嗣擇支子孫賢者為嗣孝武皇帝曾孫病已有  
詔掖庭養視至今年十八師受詩論語孝經操行節儉  
慈仁愛人可以嗣孝昭皇帝後奉承祖宗子萬姓奏可  
遣宗正德至曾孫尚冠里舍洗沐賜御府衣太僕以輅  
獵車奉迎就齊宗正府庚申入未央宮見皇太后封為



陽武侯已而羣臣奉上璽綬即皇帝位謁高廟八月己巳丞相敞薨九月大赦天下十一月壬子立皇后許氏賜諸侯王以下金錢至吏民鰥寡孤獨各有差初羣臣方議所立后上乃求微時故劔羣臣知其意乃奏立許婕妤為皇后后父廣漢封昌城君後封平恩侯皇太后歸長樂宮初置屯衛

本始元年春正月募郡國吏民訾百萬以上徙平陵遣使者持節詔郡國二千石謹牧養民而風德化大將軍

光稽首歸政上謙讓委政焉論定策功益封大將軍光  
萬七千戶車騎將軍光祿勳富平侯安世萬戶詔曰故  
丞相安平侯敞等居位守職與大將軍光車騎將軍安  
世建議定策以安宗廟功賞未加而薨其益封敞嗣子  
忠及丞相陽平侯義度遼將軍平陵侯明友前將軍龍  
錐侯增太僕建平侯延年太常蒲侯昌諫大夫宜春侯  
譚當塗侯平杜侯屠耆堂長信少府關內侯勝邑戶各  
有差封御史大夫廣明為昌水侯後將軍充國為營平

侯大司農延平為陽城侯少府樂成為爰氏侯光祿大夫遷為平邱侯賜右扶風德典屬國武廷尉光宗正德大鴻臚賢詹事畸光祿大夫吉京輔都尉廣漢爵皆關內侯德武食邑夏四月庚午地震詔內郡國舉文學高第各一人五月鳳皇集膠東千乘赦天下賜吏二千石諸侯相下至中都官官吏六百石爵各有差自左更至五大夫賜天下人爵各一級孝者二級女子百戶牛酒租稅勿收六月詔曰故太子在湖未有號謚歲時祠其

議謚置園邑秋七月詔立燕刺王太子建為廣陽王立廣陵王胥少子弘為高密王

二年春以水衡錢為平陵徙民起第宅大司農陽城侯田延年有罪自殺夏五月詔曰朕以眇身奉承祖宗夙夜惟念孝武皇帝躬履仁義選明將討不服匈奴遠遁平氏羌昆明南越百蠻鄉風款塞來享建太學修郊祀定正朔協音律封泰山塞宣房符瑞應寶鼎出白麟獲功德茂盛不能盡宣而廟樂未稱其議奏有司奏請宜

加尊號尊孝武廟為世宗廟奏盛德文始五行之舞天子世世獻武帝巡守所幸之郡國皆立廟賜民爵一級女子百戶牛酒匈奴數侵邊又西伐烏孫昆彌及公主上書言願發國精兵以擊匈奴唯天子哀憐出兵以救公主秋大興發調關東輕車銳卒選郡國吏三百石伉健習騎射者皆從軍御史大夫田廣明為祁連將軍後將軍趙充國為蒲類將軍雲中太守田順為虎牙將軍及度遼將軍范明友前將軍韓增凡五將軍兵十五萬

騎校尉常惠持節護烏孫兵咸擊匈奴

三年春正月癸亥皇后許氏崩戊辰五將軍師發長安  
夏五月軍罷祁連將軍廣明虎牙將軍順有罪下有司  
皆自殺校尉常惠將烏孫兵入匈奴右地大克獲封列  
侯大旱郡國傷旱甚者民毋出租稅三輔民就賤者且  
毋收事盡四年六月己丑丞相義薨

四年春正月詔曰蓋聞農者興德之本也今歲不登已  
遣使者振貸困乏其令太官損膳省宰樂府減樂人使

歸就農業丞相呂下至都官令丞上書入穀輸長安倉  
助貸貧民民以車船載穀入關者得毋用傳三月乙卯  
立皇后霍氏賜丞相以下至郎吏從官金錢帛各有差  
赦天下夏四月壬寅郡國四十九地震或山崩水出北  
海琅邪地震壞祖宗廟詔丞相御史與列侯中二千石  
博問經學之士有以應變輔朕之不逮毋有所諱令三  
輔太常內郡國舉賢良方正各一人律令有可蠲除以  
安百姓條奏被地震壞敗甚者勿收租賦大赦天下上

以宗廟墮素服避正殿五日五月鳳皇集北海安邱淳  
于秋廣川王吉有罪廢遷上庸自殺

地節元年春正月有星孛于西方三月假郡國貧民田  
夏六月詔宗室屬未盡而呂罪絕若有賢材改行勸善  
其復屬使得自新冬十一月楚王延壽謀反自殺十二  
月癸亥晦日有蝕之

二年春三月庚午大司馬大將軍光薨詔曰大司馬大  
將軍博陸侯宿衛孝武皇帝三十餘年輔孝昭皇帝十



有餘年遭大難躬秉義率三公諸侯九卿大夫定萬世策以安宗廟天下蒸庶咸以康寧功德茂盛朕甚嘉之復其後世疇其爵邑世世母有所與功如蕭相國夏四月鳳皇集魯郡羣鳥從之大赦天下五月光祿大夫平邱侯王遷有罪下獄死上始親政事又思報大將軍功德乃復使樂平侯山領尚書事而令羣臣得奏封事以知下情五日一聽事丞相以下各奉職奏事以傳奏其言考試功能侍中尚書功勞當遷及有異善厚加賞賜

至于子孫終不改易樞機周密品式備具上下相安莫有苟且之意也

三年春三月詔膠東相成治有異等其秩成二千石賜爵關內侯又詔加賜鰥寡孤獨高年帛二千石嚴教吏謹視遇毋令失職令內郡國舉賢良方正可親民者夏四月戊申立皇太子大赦天下賜御史大夫爵關內侯中二千石爵右庶長天下當為父後者爵一級賜廣陵王黃金千斤諸侯王十五人黃金各百斤列侯在國者

八十七人黃金各二十斤九月壬申地震冬十月詔有  
能箴朕過失及賢良方正直言極諫之士以匡朕之不  
逮毋諱有司又詔罷車騎將軍右將軍屯兵及池籩未  
御幸者假與貧民郡國宮館勿復修治流民還歸者假  
公田貸種食且勿算事十一月詔令郡國舉孝弟有行  
義聞於鄉里者各一人十二月初置廷尉平四人秩六  
百石省文山郡并蜀

四年春二月封外祖母為博平君故鄴侯蕭何曾孫建

世為侯詔民有大父母父母喪者勿繇事使得收斂送終盡其子道夏五月詔自今子首匿父母妻匿夫孫匿大父母皆勿坐其父母匿子夫匿妻大父母匿孫殊死以下皆上請廷尉以聞立廣川惠王孫文為廣川王秋七月大司馬霍禹謀反詔曰乃者東織室令史張赦使魏郡豪李竟報冠陽侯霍雲謀為大逆朕以大將軍故抑而不揚冀其自新今大司馬博陸侯禹與母宣成侯夫人顯及從昆弟冠陽侯雲樂平侯山諸姊妹壻度遼

將軍范明友長信少府鄧廣漢中郎將任勝騎都尉趙平長安男子馮殷等謀為大逆顯前又使女侍醫淳于衍進藥殺共哀皇后謀毒太子欲危宗廟逆亂不道咸伏其辜諸為霍氏所誣誤未發覺在吏者皆赦除之八月己酉皇后霍氏廢九月詔遣使者循行郡國問民所疾苦減天下鹽賈又詔令郡國歲上繫囚以掠笞若瘦死者所坐名縣爵里丞相御史課殿最以聞十二月清河王年有罪廢遷房陵

元康元年以杜東原上為初陵更名杜縣為杜陵徙丞相將軍列侯吏二千石訾百萬者於杜陵三月詔以鳳皇集泰山陳留甘露降未央宮其赦天下徒賜勤事吏中二千石以下至六百石爵自中郎吏至五大夫佐史以上二級民一級女子百戶牛酒加賜鰥寡孤獨三老孝弟力田帛所振貸勿收夏五月立皇考廟益奉明園戶為奉明縣復高皇帝功臣絳侯周勃等百六十家子孫令奉祭祀其毋嗣者復其次秋八月詔曰朕不明六

藝鬱于大道是以陰陽風雨未時其博舉吏民厥身修  
正通文學明於先聖之術宣究其意者各二人中二千  
石各一人冬置建章衛尉

二年春正月詔赦天下與士大夫厲精更始二月乙丑  
立皇后王氏賜丞相呂下至郎從官錢帛各有差三月  
以鳳皇甘露降集賜天下吏爵二級民一級女子百戶  
牛酒鰥寡孤獨高年帛夏五月詔曰比者獄吏用法持  
巧析律貳端增辭飾非奏不如實二千石各察官屬勿

用此人吏務平法或擅興繇役飾厨傳稱過使客越職踰法以取名譽朕所不取今年頗被疾疫之災其令郡國被災甚者毋出今年租賦又曰聞古天子之名難知而易諱也今百姓多上書觸諱以犯罪者朕甚憐之其更命詢諸觸諱在令前者赦之冬京兆尹趙廣漢有罪要斬

三年春以神爵數集泰山賜諸侯王丞相將軍列侯二千石金郎從官帛各有差賜天下吏爵二級民一級女



子百戶牛酒鰥寡孤獨高年帛三月詔封故昌邑王賀  
為海昏侯又詔曰朕微眇時御史大夫邴吉中郎將史  
曾史元長樂衛尉許舜侍中光祿大夫許延壽皆與朕  
有舊恩及故掖庭令張賀輔導朕躬修文學經術恩惠  
卓異厥功茂焉詩不云乎無德不報封賀所子弟子侍  
中中郎將彭祖為陽都侯追賜賀謚曰陽都哀侯吉曾  
元舜延壽皆為列侯故人下至郡邸獄復作嘗有阿保  
之功皆受官祿田宅財物各以恩深淺報之夏六月詔

曰前年夏神爵集雍今春五色鳥以萬數飛過屬縣朝  
翔而舞欲集未下其令三輔毋得以春夏摘巢探卵彈  
射飛鳥具為令立皇子欽為淮陽王

四年春正月詔曰朕惟耆老之人髮齒墮落血氣衰微  
亦亡暴虐之心今或罹文法拘執囹圄不終天命朕甚  
憐之自今已來諸年八十以上非誣告殺傷他皆勿坐  
遣太中大夫彊等十二人循行天下存問鰥寡覽觀風  
俗察吏治得失舉茂材異倫之士二月河東霍徵史等

謀反誅之三月詔以神爵五采以萬數集長樂未央北宮高寢甘泉泰畤殿中及上林苑賜天下吏爵二級民一級女子百戶牛酒加賜三老孝弟力田帛人二匹鰥寡孤獨各一匹秋八月賜右扶風尹翁歸子黃金百斤以奉其祭祀又賜功臣適後黃金人二十斤丙寅大司馬衛將軍安世薨比年豐穀石五錢

神爵元年春正月行幸甘泉祠泰畤三月幸河東祠后土詔曰迺者元康四年嘉穀元稷降于郡國神爵仍集

金芝九莖產于函德殿銅池中九真獻奇獸南郡獲白  
虎威鳳朕飭躬齋精祈為百姓東濟大河神魚出舞幸  
萬歲宮神爵翔集朕之不德懼不能任其以五年為神  
爵元年賜天下勤事吏爵二級女子百戶牛酒鰥寡孤  
獨高年帛所振貸物勿收行所過毋出田租西羌反發  
三輔中都官徒弛刑及應募倏飛射士羽林孤兒胡越  
騎三河潁川沛郡淮陽汝南材官金城隴西天水安定  
北地上郡騎士羌騎詣金城夏四月遣後將軍趙充國

彊弩將軍許延壽擊西羌六月有星孛于東方即拜酒  
泉太守辛武賢為破羌將軍與兩將軍竝進詔曰軍旅  
暴露轉輸煩勞其令諸侯王列侯蠻夷王侯君長當朝  
二年者皆毋朝秋賜故大司農朱邑子黃金百斤以奉  
祭祀是歲趙充國言屯田便宜十二事語在充國傳

二年春二月詔以鳳皇甘露降集京師赦天下夏五月  
羌虜降服斬其首惡大豪揚玉苗非首置金城屬國以  
處降羌秋匈奴日逐王先賢音田將人衆萬餘來降使

都護西域騎都尉鄭吉迎日逐破車師皆封列侯九月  
司隸校尉蓋寬饒有罪下有司自殺匈奴單于遣名王  
奉獻賀正月始和親

三年春起樂遊苑三月丙午丞相薨秋八月詔曰吏  
不廉平則治道衰今小吏皆勤事而奉祿薄欲其毋侵  
漁百姓難矣其益吏百石以下奉十五

四年春二月詔曰廼者鳳皇甘露降集京師嘉瑞並見  
修興太一五帝后土之祠祈為百姓蒙祉福鸞鳳萬舉

蜚覽翱翔集止于旁齋戒之暮神光顯著薦鬯之夕神

光交錯或降于天或登于地或從四方來集于壇上帝

嘉嚮

嚮讀曰饗

海內承福其赦天下賜民爵一級女子百戶

牛酒鰥寡孤獨高年帛夏四月潁川太守黃霸以治行

尤異秩中二千石賜爵關內侯黃金百斤及潁川吏民

有行異者爵人二級力田一級貞婦順女帛令郡國舉

賢良可親民者各一人五月匈奴單于遣弟呼留若王

勝之來朝

呼留若王謠也勝之人名

冬十月鳳皇十一集杜陵十一

月河南太守嚴延年有罪棄市十二月鳳皇集上林  
五鳳元年春正月行幸甘泉郊泰畤皇太子冠皇太后  
賜丞相將軍列侯中二千石帛人百匹大夫人八十匹  
夫人六十匹又賜列侯嗣子爵五大夫男子為父後者  
爵一級夏赦徒作杜陵者冬十二月乙酉朔日有蝕之  
左馮翊韓延壽有罪棄市

二年春三月行幸雍祠五時夏四月己丑大司馬車騎  
將軍增薨秋八月詔百姓嫁娶得具酒食相賀召郡國



二千石毋有所禁冬十一月匈奴呼遼累

遼古速字累力追反

單

于帥衆來降封為列侯十二月平通侯楊惲

於吻反

坐前

為光祿勲有罪免為庶人不悔過怨望大逆不道要斬

三年春正月癸卯丞相吉薨三月行幸河東祠后土詔

曰往者匈奴數為邊寇百姓被其害朕承至尊未能綏

安匈奴虛閭權渠單于請求和親病死右賢王屠耆堂

代立骨肉大臣立虛閭權渠單于子為呼韓邪單于擊

殺屠耆堂諸王竝自立分為五單于更相攻擊死者以

萬數畜產大耗什八九人民飢餓相燔燒以求食因大

乖亂單于闐氏

上音焉下音支

子孫昆弟及呼邀累單于名王

右伊秩訾且渠當戶以下

伊秩訾且渠當戶皆匈奴官號也訾音子移反且音子余

反

將衆五萬人來降歸義單于稱臣使弟奉珍朝賀正

月北邊晏然靡有兵革之事朕飭躬齋戒郊上帝祠后土神光竝見或興于谷燭耀齋宮十有餘刻甘露降神爵集已詔有司告祠上帝宗廟三月辛丑鸞鳳又集長樂宮東闕中樹上飛下止地文章五色留十餘刻吏民

竝觀朕之不敏婁蒙嘉瑞懼不能任其減天下口錢赦  
殊死以下賜民爵一級女子百戶牛酒大酺五日加賜  
鰥寡孤獨高年帛置西河北地屬國以處匈奴降者

四年春正月廣陵王胥有罪自殺匈奴單于稱臣遣弟

谷蠡

上音鹿  
下音犁

王入侍以邊塞亡寇減戍卒什二大司農

中丞耿壽昌奏設常平倉以給北邊省轉漕賜爵關內  
侯夏四月辛丑晦日有蝕之詔遣使者問民所疾苦復  
遣丞相御史掾二十四人循行天下舉冤獄察擅為苛

禁深刻不改者

甘露元年春正月行幸甘泉祠泰畤匈奴呼韓邪單于

遣子右賢王銖婁渠堂入侍

銖音殊婁力于反

二月丁巳大司

馬車騎將軍延壽薨夏四月黃龍見新豐丙申太上皇  
廟火甲辰孝文廟火上素服五日冬匈奴單于遣弟左  
賢王來朝賀

二年春正月立皇子囂為定陶王詔曰廼者鳳皇甘露  
降集黃龍登興醴泉滂流枯槁榮茂神光並見咸受禎

祥其赦天下減民算三十賜諸侯王丞相將軍列侯中  
二千石金錢各有差賜民爵一級女子百戶牛酒鰥寡  
孤獨高年帛夏四月遣護軍都尉祿將兵擊珠崖秋九  
月立皇子宇為東平王冬十二月行幸萑音倍陽宮屬之

反玉觀匈奴呼韓邪單于歟五原塞願奉國珍朝三年

正月詔有司議咸曰單于非正朔所加王者外客也禮  
儀宜如諸侯王稱臣昧死再拜位次諸侯王下詔曰蓋  
聞五帝三王禮所不施不及以政今匈奴單于稱北藩

臣朕德不能弘覆其以客禮待之位在諸侯王上

三年春正月行幸甘泉郊泰時匈奴呼韓邪單于稽古

反

侯姍

音刪

來朝贊謁稱藩臣而不名賜以璽綬冠帶衣

裳安車駟馬黃金錦繡繒絮使有司道單于先行就邸

長安宿長平上自甘泉宿池陽宮上登長平阪詔單于

毋謁具左右當戶之羣皆列觀蠻夷君長王侯迎者數

萬人夾道陳上登渭橋咸稱萬歲單于就邸置酒建章

宮饗賜單于觀以珍寶二月單于罷歸遣長樂衛尉高

昌侯忠車騎都尉昌騎都尉虎將萬六千騎送單于單于居幕南保光祿城詔北邊振穀食郅支單于遠遁匈奴遂定詔曰乃者鳳皇集新蔡羣鳥四面行列皆鄉鳳皇立以萬數其賜汝南太守帛百匹新蔡長吏三老孝弟力田鰥寡孤獨各有差賜民爵二級毋出今年租三月己丑丞相霸薨詔諸儒講五經同異太子太傅蕭望之等平奏其議上親稱制臨決焉乃立梁邱易大小夏侯尚書穀梁春秋博士冬烏孫公主來歸

四年夏廣川王海陽有罪廢遷房陵冬十月丁卯未央宮宣室閣火

黃龍元年春正月行幸甘泉郊泰畤匈奴呼韓邪單于來朝禮賜如初二月單于歸國詔曰今吏或以不禁姦邪為寬大縱釋有罪為不苛或以酷惡為賢皆失其中方今天下少事繇役省減兵革不動而民多貧盜賊不止其咎安在上計簿具文而已務為欺謾以避其課三公不以為意朕將何任自今諸請詔省卒徒自給者皆



止御史察計簿疑非實者按之使真偽無相亂三月有  
星孛于王良閣道入紫宮夏四月詔曰舉廉吏誠欲得  
其真也吏六百石位大夫有罪先請秩祿上通足以效  
其賢材自今以來毋得舉冬十二月甲戌帝崩于未央  
宮年四十三班固曰孝宣之治信賞必罰綜核名實政  
事文學法理之士咸精其能至于技巧工匠器械自元  
成間鮮能及之亦足以知吏稱其職民安其業也遭值  
匈奴乖亂推亡固存信威北夷單于慕義稽首稱藩功

光祖宗業垂後嗣可謂侔德殷宗周宣矣

孝宣帝本始地節元康神爵五鳳甘露各四年黃  
龍元年即位二十五年

孝元皇帝名奭之字盛宣帝太子也母曰共哀許皇后  
宣帝微時生民間年二歲宣帝即位八歲立為皇太子  
壯大柔仁好儒見宣帝所用多文法吏以刑名繩下大  
臣楊惲蓋寬饒等坐刺譏辭語見誅嘗侍燕從容言陛  
下持刑太深宜用儒生宣帝作色曰漢家自有制度本

以霸王道雜之柰何純任德教用周政乎且俗儒不達  
時宜好是古非今使人眩於名實不知所守何足委任  
乃歎曰亂我家者太子也繇是疏太子而愛淮陽王欲  
立之曰淮陽王明察好法宜為吾子而王母張婕妤尤  
幸上有意欲用淮陽王代太子然以少依許氏俱從微  
起故終不背焉黃龍元年十二月癸巳宣帝崩太子即  
皇帝位謁高廟尊皇太后曰太皇太后皇后曰皇太后  
初元元年春正月辛丑孝宣皇帝葬杜陵

陵在長安南五十里賜

諸侯王公主列侯黃金吏二千石以下錢帛各有差大赦天下三月封皇太后兄侍中中郎將王舜為安平侯丙午立皇后王氏以三輔太常郡國公田及苑可省者振業貧民貲不滿千錢者賦貸種食封外祖父平恩戴侯同產弟子中常侍許嘉為平恩侯奉戴侯後夏四月詔遣光祿大夫褒等十二人循行天下存問耆老鰥寡孤獨困乏失職之民延登賢俊招顯側陋因覽風俗之化又詔關東今年穀不登其令郡國被災害甚者毋出

租賦江海陂湖園池屬少府者以假貧民勿租賦賜宗  
室有屬籍者馬一匹至二駟三老孝者帛五匹弟者力  
田三匹鰥寡孤獨二匹吏民五十戶牛酒六月以民疾  
疫令太官損膳減樂府員省苑馬以振困乏秋八月上  
郡屬國降胡萬餘人亡入匈奴九月關東郡國十一大  
水飢或人相食轉旁郡穀以相救詔令諸宮館希幸御  
者勿繕治太僕減穀食馬水衡省肉食獸

二年春正月行幸甘泉祠泰畤賜雲陽民爵一級女子

百戶牛酒立弟竟為清河王三月立廣陵厲王太子霸  
為王詔罷黃門乘輿狗馬水衡禁園宜春下苑少府飲  
飛外池嚴籞池田假與貧民詔曰朕德不逮災異並臻  
乃二月戊午地震隴西郡毀落太上皇廟殿壁木飾壞  
敗獮音桓道縣城郭官寺及民室屋壓殺人衆山崩地裂  
水泉涌出其令郡國被地動災甚者毋出租賦赦天下  
有可蠲除減省以便百姓者條奏毋有所諱丞相御史  
中二千石舉茂材異等直言極諫之士朕將親覽焉夏

四月丁巳立皇太子賜御史大夫爵關內侯中二千石  
右庶長天下當為父後者爵一級列侯錢各二十萬五  
大夫十萬六月關東飢齊地人相食秋七月詔曰歲比  
災害一年中地再動北海水溢流殺人民其咎安在公  
卿其悉意陳朕過失靡有所諱冬詔故前將軍望之傳  
朕八年道以經書厥功茂焉其賜爵關內侯邑八百戶  
朝朔望十二月中書令弘恭石顯等譖望之令自殺  
三年春令諸侯相位在郡守下珠崖郡山南縣反待詔

賈捐之請棄之乃罷珠崖夏四月乙未晦茂陵白鶴館災詔曰天降災異有司莫言朕過百姓仍遭凶阨毋以相振朕甚閔焉其赦天下夏旱立長沙煬王弟宗為王封故海昏侯賀子代宗為侯六月詔以陰陽錯謬風雨不時其罷甘泉建章宮衛令就農百官各省費丞相御史舉天下明陰陽災異者各三人於是言事者衆或進擢見用人人自以為得上意

四年春正月行幸甘泉郊泰畤三月行幸河東祠后土



赦汾陰徒賜民爵一級女子百戶牛酒鰥寡高年帛行  
所過毋出租賦

五年春正月以周子南君為周承休侯位次諸侯王三  
月行幸雍祠五畤夏四月有星孛于參詔以皇天降異  
咎流萬民其令大官毋日殺所具各減半乘輿秣馬無  
乏正事而已罷角抵上林宮館希御幸者齊三服官北  
假田官鹽鐵官常平倉博士弟子毋置員以廣學者賜  
宗室子有屬籍者馬一匹至二駟三老孝者帛人五匹

弟者力田三匹鰥寡孤獨二匹吏民五十戶牛酒省刑  
罰七十餘事除光祿大夫以下至郎中保父母同產之  
令令從官給事官司馬中者得為大父母父母兄弟通  
籍冬十二月丁未御史大夫貢禹卒衛司馬谷吉使匈奴  
奴不還

永光元年春正月行幸甘泉郊泰畤赦雲陽徒賜民爵  
一級女子百戶牛酒高年帛行所過毋出租賦二月詔  
丞相御史舉質樸敦厚遜讓有行者光祿歲以此科第

郎從官三月詔赦天下令厲精自新各務農畝無田者  
皆假之貸種食如貧民賜吏六百石以上爵五大夫勤  
事吏二級為父後者民一級女子百戶牛酒鰥寡孤獨  
高年帛是月雨雪隕霜傷麥稼秋罷

當言罷某官某事  
此下疑有爛脫

二年春二月詔大赦天下賜民爵一級女子百戶牛酒  
鰥寡孤獨高年三老孝弟力田帛又賜諸侯王公主列  
侯黃金中二千石以下至中都官長吏各有差吏六百  
石以上爵五大夫勤事吏各二級三月壬戌朔日有蝕

之詔以天見大異以戒朕躬其令內郡國舉茂材異等  
賢良直言之士各一人夏六月詔以連年不登四方饑  
饉朕甚傷焉其赦天下秋七月西羌反遣右將軍馮奉  
世擊之八月以太常任千秋為奮威將軍別將五校並  
進

三年春西羌平軍罷三月立皇子康為濟陽王夏四月  
癸未大司馬車騎將軍接薨冬十一月詔曰乃者己丑  
地動中冬雨水大霧盜賊並起吏何不以時禁各悉意

對冬復鹽鐵官博士弟子員以用度不足民多復除毋  
以給中外繇役

四年春二月詔以百姓婁遭凶咎加以邊竟不安其赦  
天下所貸貧民勿收責三月行幸雍祠五畤夏六月甲  
戌孝宣園東闕災戊寅晦日有蝕之詔公卿勉思天戒  
慎身修永以輔朕之不逮直言盡意毋有所諱九月戊  
子罷衛思后園及戾園冬十月罷祖宗廟在郡國者諸  
陵分屬三輔以渭城壽陵亭部原上為初陵詔曰安土

重遷黎民之性頃者有司奏徙郡國民以奉園陵令百姓棄墳墓別親戚非人情所願今所為初陵者勿置縣邑使天下安土樂業亡有動搖之心布告天下使明知之又罷先后父母奉邑

五年春正月行幸甘泉郊泰時三月上幸河東祠后土秋潁川水出流殺人民吏從官縣被害者與告士卒遣歸冬上幸長楊射熊館布車騎大獵十二月乙酉毀太上皇帝孝惠皇帝寢廟園

建昭元年春三月上幸雍祠五時秋八月有白蛾羣飛蔽日從東都門至軹道冬河間王元有罪廢遷房陵罷孝文太后孝昭太后寢園

二年春正月行幸甘泉郊泰畤三月行幸河東祠后土益三河大郡太守秩戶十二萬為大郡夏四月赦天下六月立皇子興為信都王閏月丁酉太皇太后上官氏崩冬十一月齊楚地震大雨雪樹折屋壞淮陽王舅張博魏郡太守京房坐窺道諸侯王以邪意漏泄省中語

博要斬房棄市

三年夏令三輔都尉大郡都尉秩皆二千石六月甲辰

丞相元成薨秋使護西域騎都尉甘延壽副校尉陳湯

橋

與矯同

發戊己校尉屯田吏士及西域胡兵攻郅支單

于冬斬其首傳詣京師縣蠻夷邸門

四年春正月以誅郅支單于告祠郊廟赦天下夏四月

詔遣諫大夫博士賞等二十一人循行天下存問耆老

鰥寡孤獨乏困失職之人舉茂材特立之士六月甲申



中山王竟薨藍田地沙石雍霸水安陵岸崩雍涇水水  
逆流

五年春三月詔赦天下賜民爵一級女子百戶牛酒三  
老孝弟力田帛又詔方春農桑興百姓戮力之時而不  
良之吏覆案小罪徵召證案興不急之事以妨百姓公  
卿其明察申勅之夏六月庚申復戾園壬申晦日有蝕  
之秋七月庚子復太上皇寢廟園原廟昭靈后武哀王  
昭哀后衛思后園

竟寧元年春正月匈奴呼韓邪單于來朝詔以單于保塞邊垂無事其改元為竟寧賜單于待詔掖庭王嬙為關氏皇太子冠賜列侯嗣子爵五大夫天下為父後者爵一級二月御史大夫延壽卒三月癸未復孝惠皇帝寢廟園孝文太后孝昭太后寢園夏封騎都尉甘延壽為列侯賜副校尉陳湯爵關內侯黃金百斤夏五月壬辰帝崩于未央宮毀太上皇孝惠孝景皇帝廟罷孝文孝昭太后昭靈后武哀王昭哀后寢園秋七月丙戌葬

渭陵

在長安北五十六里

班彪曰臣外祖兄弟為元帝侍中語臣

曰元帝多材藝善史書鼓琴瑟吹洞簫自度曲被歌聲

分判制度窮極幼眇

上音要下音妙

少而好儒及即位徵用儒

生委之以政貢薛韋匡迭為宰相而上牽制文義優游不斷孝宣之業衰焉然寬弘盡下出於恭儉號令溫雅有古之風烈

孝元帝初元永光建昭各五年竟寧元年即位十六年

孝成皇帝名驚

五到反

之字俊元帝太子也母曰王皇后

元帝在太子宫生帝于甲觀畫堂為世嫡皇孫宣帝愛之字曰太孫常置左右三歲而宣帝崩元帝即位帝為太子壯好經書寬博謹慎初居桂宮嘗被急召出龍樓門不敢絕馳道西至直城門得絕乃度還入作室門上遲之問其故以狀對上大悅乃著令令太子得絕馳道云其後幸酒樂燕樂

上樂讀如本字或音五教反下樂音來各反

上不以為

能而定陶恭王有材藝母傳昭儀又愛幸上以故嘗有

意欲以恭王為嗣賴侍中史丹護太子家輔助有力上亦以先帝尤愛太子故得毋廢竟寧元年五月元帝崩六月乙未太子即皇帝位謁高廟尊皇太后曰太皇太后皇后曰皇太后以元舅侍中衛尉陽平侯王鳳為大司馬大將軍領尚書事己未有司言乘輿牛車馬禽獸皆非禮不宜以葬奏可秋七月大赦天下

建始元年春正月乙丑皇曾祖悼考廟災立故河間王弟上郡庫令良為王有星孛于營室罷上林詔獄二月

右將軍長史姚尹等使匈奴還去塞百餘里暴風火發  
燒殺尹等七人賜諸侯王丞相將軍列侯王太后公主  
王主吏二千石黃金宗室諸官吏千石以下至二百石  
及宗室子有屬籍者三老孝弟力田鰥寡孤獨錢帛各  
有差吏民五千戶牛酒詔以火災星變故赦天下與士  
大夫自新封舅諸吏光祿大夫關內侯王崇為安成侯  
賜舅王譚商立根逢時爵關內侯夏四月黃霧四塞博  
問公卿大夫無有所諱六月有青蠅無萬數集未央宮

殿中朝者坐秋罷上林宮館希御幸者二十五所八月  
有兩月相承晨見東方九月戊子流星光燭地長四五  
丈委曲蛇形貫紫宮十二月作長安南北郊罷甘泉汾  
陰祠是日大風拔甘泉時中大木十韋韋與  
園同以上郡國  
被災什四以上毋收田租

二年春正月罷雍五時辛巳上始郊祀長安南郊詔赦  
奉郊縣長安長陵及中都官耐罪徒減天下賦錢算四  
十閏月以渭城延陵亭部為初陵二月詔三輔內郡舉

賢良方正各一人三月北宮井水溢出辛丑上始祠后  
土於北郊丙午立皇后許氏罷六廐技巧官夏大旱東  
平王宇有罪削樊亢父縣秋罷太子博望苑以賜宗室  
朝請音才性反者減乘輿廐馬

三年春三月赦天下徒賜孝弟力田爵二級諸逋租賦  
所振貸勿收秋關內大水七月虜上小女陳持弓聞大  
水至走入橫城門闌入尚方掖門至未央宮鉤盾中吏

民驚上城

虜音斯虜上地名在渭水邊陳姓持弓名無符籍妄入宮曰闌掖門正門之傍小門如人



臂掖也橫音光長安九月詔遣諫大夫林等循行天下  
北面西頭第一門也

冬十二月戊申日有蝕之夜地震未央宮殿中詔以災  
異婁發令公卿各思朕過失明白陳之丞相御史與將  
軍列侯中二千石及內郡國舉賢良方正能直言極諫  
之士詣公車朕將覽焉越雋山崩

四年春罷中書宦官初置尚書員五人夏四月雨雪五  
月中謁者丞陳臨殺司隸校尉轅豐於殿中秋桃李實  
大水河決東郡金隄冬十月御史大夫尹忠以河決不

憂職自殺

河平元年春三月詔曰河決東郡流漂二州校尉王延  
世隄塞輒平其改元為河平賜天下吏民爵各有差夏  
四月己亥晦日有蝕之既詔公卿大夫百寮各修其職  
陳朕過失無有所諱大赦天下六月罷典屬國并大鴻  
臚秋九月復太上皇寢廟園

二年春正月沛郡鐵官冶鐵飛夏六月封舅譚商立根逢  
時皆為列侯

三年春二月丙戌隸為地震山崩雍江水水逆流秋八月乙卯晦日有食之光祿大夫劉向校中秘書謁者陳農使使求遺書於天下

四年春正月匈奴單于來朝赦天下徒賜孝弟力田爵二級諸逋租賦所振貸勿收二月單于罷歸國三月癸丑朔日有蝕之遣光祿大夫博士嘉等十一人行舉瀕河之郡水所毀傷困乏不能自存者財振貸其為水所流壓死不能自葬令郡國給槨槨葬埋

槨音衛槨音讀小棺也

已

葬者與人錢二千避水它郡國在所冗食之

冗如勇反散也母

令失職舉敦厚有行能直言之士壬申長陵臨涇岸崩  
雍涇水夏六月庚戌楚王囂薨山陽火生石中改元為  
陽朔

陽朔元年春二月丁未晦日有蝕之三月赦天下徒冬  
京兆尹王章有罪下獄死

二年春寒詔令公卿大夫政事務順四時月令三月大  
赦天下夏五月除吏八百石五百石秩秋關東大水流

民欲入函谷天井壺口五阮

阮其遠反

關者勿苛留遣諫大

夫博士分行視八月甲申定陶王薨九月詔奉使者不稱令丞相與中二千石二千石雜舉可充博士位者使卓然可觀是歲御史大夫張忠卒

三年春三月壬戌隕石東郡八夏六月潁川鐵官徒申屠聖等百八十人殺長吏盜庫兵自稱將軍經歷九郡遣丞相長史御史中丞逐捕以軍興從事皆伏辜秋八月丁巳大司馬大將軍王鳳薨

四年春正月詔令二千石勉勸農桑二月赦天下秋九月壬申東平王宇薨閏月壬戌御史大夫于永卒

鴻嘉元年春二月詔遣諫大夫理等舉三輔三河弘農  
冤獄令公卿大夫部刺史明申敕守相以稱朕意其賜  
天下民爵一級女子百戶牛酒加賜鰥寡孤獨高年帛  
逋貸未入者勿收壬午行幸初陵赦作徒以新豐戲鄉  
為昌陵縣奉初陵賜百戶牛酒上始為微行出冬黃龍  
見真定

二年春行幸雲陽三月博士行飲酒禮有雉蜚集于庭  
歷階升堂而雉復集諸府又集承明殿詔舉敦厚有行  
義能直言者夏徙郡國豪傑訾五百萬以上五千戶于  
昌陵賜丞相御史將軍列侯公主中二千石冢地第宅  
六月立中山憲王孫雲客為廣德王

三年夏四月赦天下令吏民得買爵賈級千錢大旱秋  
八月乙卯孝景廟闕災冬十一月甲寅皇后許氏廢廣  
漢男子鄭躬等六十餘人攻官寺篡囚徒盜庫兵自稱

山君

四年春正月詔以水旱為災關東流冗者衆青幽冀部尤劇遣使者循行郡國被災害什四以上民貲不滿三萬勿出租賦逋貸未入皆勿收流民欲入關輒籍內所之郡國謹遇以理務有以全活之思稱朕意秋勅海清河河溢被災者振貸之冬廣漢鄭躬等黨與竇廣犯歷四縣衆且萬人拜河東都尉趙護為廣漢太守發郡中及蜀郡合三萬人擊之或相捕斬除罪旬月平遷護為



執金吾賜黃金百斤

永始元年春正月癸丑太官凌室火戊午辰后園闕火  
夏四月封健仔趙氏父臨為成陽侯五月封舅曼子侍  
中騎都尉光祿大夫王莽為新都侯六月丙寅立皇后  
趙氏大赦天下秋七月詔曰朕執德不固謀不盡下過  
聽將作大匠萬年言昌陵三年可成作治五年中陵司  
馬殿門內尚未加功天下虛耗百姓罷勞客土疏惡終  
不可成朕惟其難怛然傷心夫過而不改是謂過矣其

罷昌陵及故陵勿徙吏民令天下毋有搖動之心立城陽孝王子理為王八月丁丑太皇太后王氏崩

二年春正月己丑大司馬車騎將軍王音薨二月癸未夜星隕如雨乙酉晦日有蝕之詔曰乃者龍見東萊日有蝕之天著變異以顯朕郵朕甚懼焉公卿申救百寮深思天誠有可省減便安百姓者條奏所振貸貧民勿收又曰關東北歲不登吏民以義收食貧民穀物助縣官振贍者已賜直其百萬以上加賜爵右更欲為吏補

三百石其吏也遷二等三十萬以上賜爵五大夫吏亦  
遷二等民補郎十萬以上家毋出租賦三歲萬錢以上  
一年冬十一月行幸雍祠五時十二月詔曰前將作大  
匠萬年知昌陵卑下妄請營作積土增高多興繇役百  
姓罷極天下匱竭常侍閤前為大司農中丞數奏昌陵  
不可成侍中衛尉長數白宜早止徙家反故處閤前賜  
爵關內侯黃金百斤今賜長關內侯食邑千戶閤五百  
戶萬年邪佞不忠毒流衆庶雖蒙赦不宜居京師其徙

萬年煇煌郡是歲御史大夫王駿卒

三年春正月己卯晦日有蝕之詔曰天災仍重朕甚懼  
焉惟民之失職臨遣太中大夫嘉等循行天下存問耆  
老民所疾苦其與部刺史舉惇樸遜讓有行義者各一  
人冬十月庚辰皇太后詔有司復甘泉泰畤汾陰后土  
雍五畤陳倉陳寶祠十一月尉氏男子樊並等十三人  
謀反殺陳留太守劫略吏民自稱將軍徒李譚等五人  
共格殺並等皆封為列侯十二月山陽鐵官徒蘇令等

二百二十八人攻殺長吏盜庫兵自稱將軍經歷郡國  
十九殺東郡太守汝南都尉遣丞相長史御史中丞持  
節督趣逐捕汝南太守嚴訢捕斬令等遷訢為大司農  
賜黃金百斤

四年春正月行幸甘泉郊泰畤神光降集紫殿大赦天  
下賜雲陽吏民爵女子百戶牛酒鰥寡孤獨高年帛三  
月行幸河東祠后土賜吏民如雲陽行所過毋出田租  
夏四月癸未長樂臨華殿未央宮東司馬門皆災六月

甲午霸陵園門闕災出杜陵諸未嘗御者歸家詔曰乃者地震京師火災婁降朕甚懼之有司其悉心明對厥咎朕將親覽焉又曰聖王明禮制以序尊卑異車服以彰有德今公卿列侯親屬近臣奢侈踰制吏民慕效寔以成俗其申敕有司以漸禁之青綠民所常服且勿止列侯近臣各自省改司隸校尉察不變者秋七月辛未晦日有蝕之

元延元年春正月己亥晦日有蝕之三月行幸雍祠五

時夏四月丁酉無雲有雷聲光耀耀四面下至地昏止  
赦天下秋七月有星孛于東井詔公卿博士議郎各悉心  
惟思變意明以經對母有所諱與內郡國舉方正能  
直言極諫者各一人北邊二十二郡舉勇猛知兵法者  
各一人封蕭相國後喜為鄼侯冬十二月辛亥大司馬  
大將軍王商薨是歲昭儀趙氏害後宮皇子

二年春正月行幸甘泉郊泰畤三月行幸河東祠后土  
夏四月立廣陵孝王子守為王冬行幸長楊宮從胡客

大校獵宿蒔陽宮賜從官

三年春正月丙寅蜀郡岷山崩雍江三日江水竭二月  
封侍中衛尉淳于長為定陵侯三月行幸雍祠五畤  
四年春正月行幸甘泉郊泰畤二月罷司隸校尉官三  
月行幸河東祠后土甘露降京師賜長安民牛酒

綏和元年春正月大赦天下二月癸丑詔曰朕承太祖  
鴻業奉宗廟二十五年德不能綏理宇內百姓怨恨者  
衆不蒙天祐至今未有繼嗣天下無所繫心觀于往古



近事之戒禍亂之萌皆由斯焉定陶王欣於朕為子慈  
仁孝順可以承天序繼祭祀其立欣為皇太子封中山  
王舅諫大夫馮參為宜鄉侯益中山國三萬戶以慰其  
意賜諸侯王列侯金天下當為父後者爵三老孝弟力  
田帛各有差又曰蓋聞王者必存二王之後所以通三  
統也昔成湯受命列為三代而祭祀廢絕考求其後莫  
正孔吉其封吉為殷紹嘉侯三月進爵為公及周承休  
侯皆為公地各百里行幸雍祠五畤夏四月以大司馬

車騎將軍根為大司馬罷將軍官御史大夫為大司空封  
為列侯益大司馬大司空奉如丞相秋八月庚戌中山  
王興薨冬十一月立楚孝王孫景為定陶王定陵侯淳  
于長大逆不道下獄死廷尉孔光使持節賜貴人許氏  
藥飲藥死十二月罷部刺史更置州牧秩二千石

二年春正月行幸甘泉郊泰畤二月壬子丞相翟方進  
薨三月行幸河東祠后土丙戌帝崩于未央宮年四十  
六皇太后詔有司復長安南北郊四月己卯葬延陵

在扶

風去長安班彪曰臣之姑充後宮為婕妤父子昆弟侍  
六十二里帷幄數為臣言成帝善修容儀升車立正不內顧不疾  
言不親指臨朝淵嘿尊嚴若神可謂穆穆天子之容者  
矣博覽古今容受直辭公卿稱職奏議可述遭世承平  
上下和睦然湛于酒色趙氏內亂外家擅朝言之可為  
於邑建始以來王氏始執國命哀平短祚莽遂篡位蓋  
其威福所由來者漸矣

孝成帝建始河平陽朔鴻嘉永始元延各四年綏

和二年即位二十六年

孝哀皇帝名欣之字喜元帝庶孫定陶恭王子也母曰  
丁姬年三歲嗣立為王長好文辭法律元延四年入朝  
畫從傅相中尉時成帝少弟中山孝王亦來朝獨從傅  
上怪之以問定陶王對曰令諸侯王來朝得從其國二  
千石傅相中尉皆國二千石故畫從之上令誦詩通習  
能說他日問中山王獨從傅在何法令不能對令誦尚  
書又廢及賜食於前後飽起下韞繫解成帝由此以為

不能而賢定陶王數稱其材時王祖母傳太后隨王來朝私賂遺上所幸趙昭儀及帝舅票騎將軍曲陽侯王根昭儀及根見上亡子亦欲豫自結為長久計皆更稱定陶王勸帝以為嗣成帝亦自美其材為加元服而遣之時年十七矣明年使執金吾任宏守大鴻臚持節徵定陶王立為皇太子謝曰臣幸得繼父守藩為諸侯王材質不足以假充太子之宮陛下聖德寬仁敬承祖宗奉順神祇宜蒙福祐子孫千億之報臣願且得留國邸

旦夕奉問起居俟有聖嗣歸國守藩書奏天子報聞後  
月餘立楚孝王孫景為定陶王奉恭王祀所以獎厲太  
子專為後之誼綏和二年三月成帝崩四月丙午太子  
即皇帝位謁高廟尊皇太后曰太皇太后皇后曰皇太  
后大赦天下賜宗室王子有屬者馬各一駟吏民爵百  
戶牛酒三老孝弟力田鰥寡孤獨帛太皇太后詔尊定  
陶恭王為恭皇五月丙戌立皇后傅氏詔曰春秋母以  
子貴尊定陶太后曰恭皇太后丁姬曰恭皇后各置左

右詹事食邑如長信宮中宮追尊傅父為崇祖侯丁父  
為褒德侯封舅丁明為陽安侯舅子滿為平周侯追謚  
滿父忠為平周懷侯皇后父晏為孔鄉侯皇太后弟侍  
中光祿大夫趙欽為新成侯六月詔曰鄭聲淫而亂樂  
聖王所放其罷樂府曲陽侯根前以大司馬建社稷策  
益封二千戶太僕安陽侯舜輔導有舊恩益封五百戶  
及丞相孔光大司空汜鄉侯何武益封各千戶詔曰河  
間王良喪太后三年為宗室儀表益封萬戶又曰諸侯

王列侯公主吏二千石及豪富民多畜奴婢田宅亡限  
與民爭利百姓失職其議限列有司條奏諸王列侯得  
名田國中列侯在長安及公主名田縣道關內侯吏民  
名田皆無得過三十頃諸侯王奴婢二百人列侯公主  
百人關內侯吏民三十人年六十以上十歲以下不在  
數中賈人皆不得名田為吏犯者以律論諸民田畜奴  
婢過品皆沒入縣官齊三服官諸官織綺繡難成害女  
紅之物皆止無作輸除任子令及詐謫詆欺法掖庭宮



人年三十以下出嫁之官奴婢五十以上免為庶人禁  
郡國無得獻名獸益吏三百石以下奉察吏殘賊酷虐  
者以時退有司無得舉赦前往事博士弟子父母死予  
寧三年秋七月罷大司馬莽就第曲陽侯根成都侯況  
皆有罪根就國況免為庶人歸故郡詔以間者日月亡  
光五星失行郡國比比地動河南潁川郡水出流殺人  
民壞敗廬舍朕甚懼焉已遣光祿大夫循行舉籍賜死  
者棺錢人三千其令水所傷縣邑及他郡國災害什四

以上民貲不滿十萬皆毋出今年租賦

建平元年春正月赦天下侍中騎都尉新成侯趙欽成陽侯趙訢皆有罪免為庶人徙遼西太皇太后詔外家王氏田非冢瑩皆以賦貧民二月詔大司馬列侯將軍中二千石州牧守相舉孝悌敦厚能直言通政事延于側陋可親民者各一人三月賜諸侯王公主列侯丞相將軍中二千石中都官郎吏金錢帛各有差冬中山孝王太后媛弟宜鄉侯馮參有罪皆自殺

二年春正月罷大司空復御史大夫夏四月詔曰漢家之制推親親以顯尊尊定陶恭皇之號不宜復稱定陶尊恭皇太后曰帝太太后稱永信宮恭皇后曰帝太后稱中安宮立恭皇廟于京師赦天下徒罷州牧復刺史六月庚申帝太后丁氏崩詔起陵於恭皇之園發陳留濟陰近郡國五萬人穿復土待詔夏賀良等言赤精子之讖漢家歷運中衰當再受命宜改元易號詔赦天下以建平二年為太初元年號曰陳聖劉太平皇帝漏刻

以百二十為度七月以渭城西北原上永陵亭部為初陵勿徙郡國民使得自安八月詔以夏賀良等言皆違經背古不合時宜六月甲子制書非赦令也皆蠲除之賀良等反道惑衆下有司皆伏辜丞相博御史大夫元孔鄉侯晏有罪博自殺元減死二等晏削戶四分之一語在博傳

三年春正月立廣德夷王弟廣漢為廣平王癸卯帝太太后所居桂宮正殿火三月己酉丞相當薨有星孛于

河鼓夏六月立魯頃王子郢

郢音魚又音吾

鄉侯閔為王冬十

一月壬子復甘泉泰畤汾陰后土祠罷南北郊東平王雲雲后謁安成恭侯夫人放皆有罪雲自殺謁放棄市四年春大旱關東民傳行西王母籌經歷郡國西入關至京師民又會聚祠西王母或夜持火上屋擊鼓號呼相驚恐二月封帝太后從弟侍中傅商為汝昌侯太后同母弟子侍中鄭業為陽信侯三月侍中駙馬都尉董賢光祿大夫息夫躬南陽太守孫寵皆以告東平王

封列侯夏四月賜中二千石至六百石及天下男子爵  
六月尊帝太后為皇太太后秋八月恭皇園北門災  
冬詔將軍中二千石舉明兵法有大慮者

元壽元年春正月辛丑朔日有蝕之詔公卿大夫陳朕  
過失無有所諱其與將軍列侯中二千石舉賢良方正  
能直言者各一人大赦天下丁巳皇太太后傅氏崩三  
月丞相嘉有罪下獄死秋九月大司馬票騎將軍丁明  
免孝元廟殿門銅龜蛇鋪首鳴

門鋪首作龜蛇之形所以銜環也鋪音胡反

二年春正月匈奴單于烏孫大昆彌來朝二月歸國單于不說夏四月壬辰晦日有蝕之五月正三公官分職大司馬衛將軍董賢為大司馬丞相孔光為大司徒御史大夫彭宣為大司空封長平侯正司直司隸造司寇職事未定六月戊午帝崩于未央宮年二十六秋九月壬寅葬義陵

義陵在扶風去長安四十六里

班氏曰孝哀自為藩王及

充太子之宮文辭博敏幼有令聞睹孝成世祿去王室權柄外移是故臨朝婁誅大臣欲彊主威以則武宣雅

性不好聲色時覽卞射武戲即位痿痺末年寢劇饗國不永哀哉

孝哀皇帝建平四年元壽二年即位六年

孝平皇帝初名箕子元始二年更名衍之字樂元帝庶孫中山孝王子也母曰衛姬年三歲嗣立為王元壽二年六月哀帝崩太皇太后詔曰大司馬董賢年少不合衆心其上印綬罷賢即日自殺新都侯王莽為大司馬領尚書事秋七月遣車騎將軍王舜大鴻臚左咸使持



節迎中山王辛卯貶皇太后趙氏為孝成皇后退居北宮哀帝皇后傅氏退居桂宮孔鄉侯傳晏少府董恭等皆免官爵徙合浦九月辛酉中山王即皇帝位謁高廟大赦天下帝年九歲太皇太后臨朝大司馬莽秉政百官總已以聽於莽詔赦天下

元始元年春正月越裳氏重譯獻白雉一黑雉二詔使三公以薦宗廟羣臣奏言大司馬莽功德比周公賜號安漢公及太師孔光等皆益封賜天下民爵一級吏在

位二百石以上一切滿秩如真立故東平王雲太子開明為王故挑鄉頃侯子成都為中山王封宣帝耳孫信等三十六人皆為列侯太僕王惲等二十五人前議定陶傳太后尊號守經法不阿指從邪右將軍孫建爪牙大臣大鴻臚咸前正議不阿後奉節使迎中山王及宗正劉不惡執金吾任岑中郎將孔永尚書令姚恂沛郡太守石詡皆以前與建策東迎即位奉事周密勤勞賜爵關內侯食邑各有差賜帝徵即位前所過縣邑吏二

千石以下至佐史爵各有差又令諸侯王公列侯關內侯亡子而有孫若子同產子者皆得以為嗣公列侯嗣子有罪耐以上先請宗室屬未盡而以罪絕者復其屬其為吏舉廉佐史補四百石天下吏比二千石以上年老致仕者參分故祿以一與之終其身遣諫大夫行三輔舉籍吏民以元壽二年倉卒時橫賦斂者償其直義陵民冢不妨殿中者勿發天下吏民亡得置什器儲侍二月置羲和官秩二千石外史閭師秩六百石班教化

禁淫祀放鄭聲乙未義陵寢神衣在柙中丙申旦衣在  
牀上寢令以急變聞用太牢祠夏五月丁巳朔日有蝕  
之大赦天下公卿將軍中二千石舉敦厚能直言者各  
一人六月使少府左將軍豐賜帝母中山孝王姬璽書  
拜為中山孝王后賜帝舅衛寶寶弟元爵關內侯賜帝  
女弟四人號皆曰君食邑各二千戶封周公後公孫相  
如為褒魯侯孔子後孔均為褒成侯奉其祀追謚孔子  
曰褒成宣尼公罷明光宮及三輔馳道天下女徒已論

歸家顧山錢月三百復貞婦鄉一人置少府海丞果丞  
各一人大司農部丞十三人人部一州勸農桑太皇太  
后省所食湯沐邑十縣屬大司農常別計其租入以贍  
貧民秋九月赦天下徒以中山苦陘縣為中山孝王后  
湯沐邑

二年春黃支國獻犀牛詔曰皇帝二名通于器物今更  
名合於古制使太師光奉太牢告祠高廟夏四月立代  
孝王元孫之子如意為廣宗王江都易王孫盱台侯宮

為廣川王廣川惠王曾孫倫為廣德王封故大司馬博  
陸侯霍光從父昆弟曾孫陽宣平侯張敖元孫慶忌絳  
侯周勃元孫共舞陽侯樊噲元孫之子章皆為列侯復  
爵賜故曲周侯酈商等後元孫酈明友等百一十三人  
爵關內侯食邑各有差郡國大旱蝗青州尤甚民流亡  
安漢公四輔三公卿大夫吏民為百姓困乏獻其田宅  
者二百三十人以口賦貧民遣使者捕蝗民捕蝗詣吏  
以石斛受錢天下民貲不滿二萬及被災之郡不滿十

萬勿租稅民疾疫者舍空邸第為置醫藥賜死者一家  
六尸以上葬錢五千四尸以上三千二尸以上二千罷  
安定呼池苑以為安民縣起官寺市里募徙貧民縣次  
給食至徙所賜田宅什器假與犁牛種食又起五里於  
長安城中宅二百區以居貧民秋舉勇武有節明兵法  
郡一人詣公車九月戊申晦日有蝕之赦天下徒使謁  
者大司馬掾四十四人持節行邊兵執金吾侯陳茂假  
以鉦鼓募汝南南陽勇敢吏士三百人諭說江湖賊成

重等二百餘人皆自出送家在所收事重徙雲陽賜公田宅冬中二千石舉治獄平歲一人

三年春詔有司為皇帝納采安漢公莽女語在莽傳又詔光祿大夫劉歆等雜定婚禮四輔公卿大夫博士郎吏家屬皆以禮娶親迎立輅併馬夏安漢公奉車服制度吏民養生送終嫁娶奴婢田宅器械之品立官稷及學官郡國曰學縣道邑侯國曰校校學置經師一人鄉曰庠聚曰序序庠置孝經師一人陽陵任橫等自稱將



軍盜庫兵攻官寺出囚徒大司徒掾督逐皆伏辜安漢公世子宇與帝外家衛氏有謀宇下獄死誅衛氏

四年春正月郊祀高祖以配天宗祀孝文以配上帝改殷紹嘉公曰宋公周承休公曰鄭公詔百寮自今婦女非身犯法及男子年八十以上七歲以下家非坐不道詔所名捕它皆無得繫其當驗者即驗問定著令二月丁未立皇后王氏大赦天下遣太僕王惲等八人置副假節分行天下覽觀風俗賜九卿以下至六百石宗室

有屬籍者爵自五大夫以上各有差賜天下民爵一級  
鰥寡孤獨高年帛夏皇后見于高廟加安漢公曰宰衡  
賜公太夫人號曰功顯君封公子安臨皆為列侯安漢  
公奏立明堂辟靡尊孝宣廟為中宗孝元廟為高宗天  
子世世獻祭冬置西海郡徙天下犯禁者處之梁王立  
有罪自殺分京師置前輝光後丞烈二郡更公卿大夫  
八十一元士官名位次及十二州名分界郡國所屬罷  
置改易天下多事吏不能紀冬大風吹長安城東門屋

瓦且盡

五年春正月祫祭明堂諸侯王二十八人列侯百二十人宗室子九百餘人徵助祭禮畢皆益戶賜爵及金帛增秩補吏各有差詔曰惟宗室子皆太祖高皇帝子孫及兄弟吳頃楚元之後漢元至今十有餘萬人雖有王侯之屬莫能相糾或陷入刑罪教訓不至之咎也自太上皇以來族親各以世氏郡國置宗師以糾之致教訓焉二千石選有德義者以為宗師考察不從教令有寃

失職者宗師得因郵亭書言宗伯請以聞常以歲正月  
賜宗師帛各十匹義和劉歆等四人使治明堂辟廱令  
漢與文王靈臺周公作洛同符太僕王憚等八人使行  
風俗宣明德化萬國齊同皆封為列侯徵天下通知逸  
經古記天文歷算鍾律小學史篇方術本草及以五經  
論語孝經爾雅教授者在所為駕一封軺傳遣詣京師  
至者數千人閏月立梁孝王元孫之耳孫音為王帝益  
壯以衛后故怨不悅冬十二月丙午莽因臘日上椒酒

置毒酒中帝崩于未央宮大赦天下有司議曰禮臣不殤君皇帝年十有四歲宜以禮歛加元服奏可葬康陵

在長安北六十里

詔曰皇帝仁惠無不顧哀每疾一發氣輒上

逆害於言語故不及有遺詔其出媵妾皆歸家得嫁如孝文時故事班氏曰孝平之世政自莽出褒善顯功以自尊盛觀其文辭方外百蠻亡思不服休徵嘉應頌聲並作至乎變異見于上民怨於下莽亦不能文也莽立宣帝之元孫廣戚侯之子嬰為帝年三歲號曰孺子遂

引周公居攝故事明年改元居攝後二年篡位定有天下之號曰新改元初始初始一年始建國五年天鳳六年地皇四年

孝平帝元始五年

右漢自高祖至孺子十三帝通王莽合二百二十九年漢二百十四年偽新十五年

通志卷五下